







JACOBI STELLINI

C. R. S.

IN GYMNASIO PATAVINO

Ethicae Professoris

DE ORTU & PROGRESSU


*Morum, atque opinionum ad mores  
pertinentium Specimen.*



VENETIIS

*Superiorum Permissu.*





# ANGELO EMO

SENATORI AMPLISSIMO



JACOBUS STELLINI

F.



*Eve specimen , quo morum , & opinionum de rebus expetendis ortum , atque progressum ex evolutione facultatum humanarum ducere conatus sum , ut inscriptum prodeat , Senator Amplissime , glorioso , & illustri nomine tuo , magis impetu quodam animi , quam ratione ,*

A 2 &

& consilio factum est. Non enim tam cogitavi, tuae quid & summae dignitati, & prudentiae rerum eximia conveniret, quam beneficiorum tuorum specie mihi assidue obversante in banc mentem impulsus sum, ut, qua ratione possem, profiterer, nihil mihi fortunatius accidere potuisse, quam ut ei multa debeam, cujus aequae beneficiis ornari jucundum sit, ac iudicio gravissimo non indignum bisce omnino putari perhonorificum. Etsi vero spectasse magis videar, quid esset mihi ad commendationem hominum profuturum, quam quid amplitudinem tuam deceat, atque scientiam rerum maximarum; nihil tamen alienum feci moribus tuis. Nam te persaepe dimittis a dignitate tua, vultumque ponis viri principis, ut hominum congressu liberiore fruaris, & quidquid in iis est cognitione dignum, alacrius expromendi potestatem facias eisdem, addasque animos. Multo enim gratius tibi, jucundiusque est animi virtutes, opesque mentis explicare, quam magistratus insignia; deque viribus ingenii cujusque judicare, quam de capite, fortunisque civium. Quod cum difficile sit, atque etiam periculosum ei, qui praeter ornamenta dignitatis vix quidquam



quam proprium, ac suum babeat, id expeditum est, ac tutum tibi, qui magnitudine, acumine, ac maturitate ingenii singulari praeditus, omnique doctrina homine nobili digna, & rerum omnium experientia diuturna instructus, auctusque es. Tanto enim suspiciendus magis videaris, quo propius agnosceris, impedimentis omnibus amotis, quae vaporum, more dum magnitudinem augent, lucem nativam intercipiunt, atque hebetant. Nam te ad omnia, quae belli, ac pacis rebus ornamento sunt, ac praesidio, natura finxit, & incredibile studium excitavit; in omnibus assiduus erudit ut usus, reique fortuna publicae exercuit; ut nulla praeter caeteras in te virtus emineat, sed una omnes natae, ac adultae sese mutuo regant, atque perficiant; potiore nullam habeas, sed, ut cognatione conjunctas decet, aequae omnes diligas, aequae omnes colas, & in magnum aliquod patriae tempus conferas. Quare, quod mirum oppido visum est, tam facile tibi, promptumque fuit, in periculis praecavendis prospicientiam, subeundis constantiam, depellendis invictum animi robur edere, quam in negotiis gerendis fidem, expediendis dexteritatem,

conficiendis industriam , ac diligentiam ;  
ut & salutem communem virtute de-  
fenderis temporibus difficillimis , &  
publicae tranquillitatis atque otii diuturni-  
tati consilio provideris : quae cum maxima  
sint , egregia vero fuisse necesse est adju-  
menta illa , quibus ad haec tanta contem-  
disti . Sunt autem excelsitas , & magnitu-  
do animi , celeritasque mentis , & pruden-  
tia perspicax instrumenta ea , quibus ma-  
gnae res , ac difficiles expediri , & confici  
solent . Alterius est ad summa coniti ,  
parva transilire , difficultate nulla terreri ,  
nulloque labore frangi , nihil acerbe , nihil  
avare , nihil arroganter agere , magnificen-  
tiam praesferre in moribus , atque despicien-  
tiam rerum humanarum . Nam morosus  
in parvis , & anxius ipse se impedit , adi-  
tumque ad magna obserrat ; concitatus , &  
insolens omnia disturbat , augetque difficul-  
tates ; restrictus , & angustus , dum pensu-  
culate , timideque cavet , ne quid frustra  
perdat , opportunitates amittit saepe rerum  
maximas . Alteri vero attributum est , ut  
idonea prospiciat ad agendum tempora , rei  
gerendae viam , & rationem omnem expli-  
catam , & comprehensam teneat ; eorum  
quibuscum transigendum quidpiam est , in-  
genia ,

genia, mores, sensus animi, studia, consilia exploret omnia, callideque introspiciat. Nam si quis baud norit eum, quem aggredi instituit, plerunque repelletur, quippe qui nesciat, qua parte praesertim adeundus, & quibus artibus oppugnandus; ille sit; ac si rerum quasi contextum ordinate descriptum intelligentie non complectatur, opportuna transmittet, intempestiva obtrudet, praepostere multa molietur confusis consiliis, ordinis perturbato; magnoque conatu multa movens nihil promovebit. Qui vero ad suscepta negotia utrumque afferat, praestantem animum, excellensque ingenium, hic in eos equidem dominatur, qui tractandi sibi obtigerint, ac rerum exitus sua quodammodo in potestate habet. Siquidem ea maximi animi, consiliique summi vis est ut homines etiam natura feros, & elatos rebus secundis splendore suo capiat, ac sibi deditos habeat; ut, quae neque vi sibi, neque ratione ulla extorqueri paterentur, ea vel aequitate victi ultro deferant, vel animi propensione, ac studio molliti e manibus elabi fiant. Quae qui cogitet, ei minime novum videri potest, si, qui possides virtutes has insitas genti tuae, majorum exempla a vi-

ro summo Joanne fratre renovata continuasti, ac perfecisti, ut a populis etiam barbaris bonos babeatur generosis moribus exterorum; & ab iis ipsis, qui cupiditate, ac potentia metiuntur omnia, utilitati aliquando praeferatur aequum, & bonum. Ac ne dotes hasce magis elicuisse amplitudo, ac splendor rerum gerendarum, quam ipsa ultro effudisse natura tua videretur, singulari fato quodam, accidisse arbitror, ut novi, ac molesti labores tibi suscipiendi fuerint eo tempore aetatis, quod a natura tributum est viris optime de Republica meritis ad honestam quietem, & voluptatem eam perfruendam, quae capitur ex recodatione rerum praeclare gestarum, & auctoritate tanta, quanta in bene morata civitate virtuti, & consilio tribui solet. Atque ita quidem in eo munere te gessisti, ut incommoda diuturna valetudinis infestae magnitudine animi superaris; quidquid ab ea temporis substractum negotiis est, diligentia restitueris, communibusque commodis providentissime consulueris, neque siveris, ut iniquitati temporum aliud liceret, quam quod necesse fuit, hominique probibere datum non est. Ab hac igitur tanta virtutum indole, tamque experrecta  
ad

ad ea etiam, quae plus laboris, quam admirationis habent, quid alienius unquam sit, quam pompa, et fucus? quidque magis illi expetendum, quam ut pure, dilucideque prodeat, apparatu nullo impedita, nulloque molimine gravis? Quapropter nihil te facilius, nihil comius, nihil humanius, ob eamque rem nihil mihi nunc opportunius. Opus enim praesertim humanitate tua mihi est ad hanc rem, quam sisto tibi, ac nuncupo; quod ea vix aliud sit, quam adumbratio quaedam argumenti, si Deus incoepto fauveat, latius explicandi, quo cupiditatum humanarum, eorumque bonorum series ordine pertextetur, quorum vulgares homines, & philosophi ipsi vel informarunt inanem speciem, vel perturbarunt gradus. Qua in re id percommode accidit, ut sese a capite ipso dent obviam suis quaeque locis sententiae eae, quae jura naturae foedissime confuderunt, ac morum leges ad affectionem animi cujusque propriam accommodarunt; rerumque ordo palam faciat, quid in radice ipsa vitii lateat; ac si quid ab aliquo recte, splendideque dictum videatur, cum manifestum sit illud ex fonte corrupto manare, non ideo recte sentire eum quispiam putet, quod vera  
quae-

quaedam proferat. Non enim quid quisque dicat, attendendum est, ut fere fit a plerisque, sed ex quo fonte hauserit, investigandum: neque si qui verbis, iccirco re etiam convenire putandi sunt. Sed haec alterius & loci, & temporis. Quod hic maxime facit, illud est, ut te obsecrem, ne hoc, quodcumque est, alio vultu suscipias, quam quo soles omnia; meque benignitate ea foveas, qua tua virtus omnis condita est. Caeteras animi tui dotes admirantur universi, hanc autem diligunt; quod illae magnis rebus addictae sint, haec opportuna cuique pateat. Efficiunt illae quidem, ut boni omnes te diu patriae, sed haec, ut te diu sibi quisque incolumem optent. Illarum enim utilitas ad singulos e longinquo pertinet, ad easque non omne tempus accommodatum est; hujus autem usus unumquemque proxime attingit, eique nunquam occasio deesse potest.

De



*De ortu & progressu morum & opinio-  
num ad mores pertinentium.*



**E**tsi populorum scitis & institutis ab honestate saepe alienis, & philosophorum opinionibus, atque decretis inter se dissidentibus extenuari momenta nequeant earum legum, quibus humanae gentis vitam atque societatem contineri debere universa natura monet; ea tamen colluvies morum, ac praeceptorum caliginem tantam offudit rationi, tamque foedam inussit vitae labem, ut aegre altera disjici, altera detergi, diluique possit. Quare ne gentium moribus, hominumque sententiis ii tribuant nimium, quibus fatis est, esse quidpiam in more majorum positum, aut etiam scriptoris, qui se doctrinae laude commendavit, auctoritate fultum, ut probent illud, ac rectum esse praedi-

dicent; homines autem socordes ac minime callidos in fraudem illiciant ii, quos tanquam perditos in republica cives inordinata esse omnia & perturbata juvat, ut impune quidlibet audendi potestatem habeant, rem altius ab origine ultima repetendam, ejusque gradus & quasi processus ordine relegendos esse duxi. Nam re tota in pauca contracta facile quisque intelliget quibus e fontibus opiniones, ac mores tam multiformes eruperint: quommodo novis identidem irruentibus exturbati veteres, aut immutati adeo sint, ut & si dispari genere, tamen utrique coaluerint: qui demum factum sit, ut late pervagati florentissimas inter gentes non inhabitarent modo, sed etiam sculpti sanctissimis in locis steterint, & fana habuerint; neque furtim irrepsisse, sed acciti consulto esse, diis hominibusque plaudentibus incivitatem suscepti, & auspicato ceremoniis illigati videri queant.

Quod ut ad cognoscendum magis in aperto sit, videndum primo quo ordine pro facultatum humanarum evolutione varia se se gradatim occasione  
dara



( III )

data cupiditates evolverint, & opiniones accommodatae cupiditatibus evolutis adnatae sint: deinde qua ratione, & via sensim explicatis ingenii viribus, opiniones hae proponi aliis ac tradi consueverint; & quibus ex principiis deduci varie, prout observatione diuturna leges eas, quibus universa natura regeretur, introspicere quisque potuit, aut ex ea disciplina, quam summam haberet intimamque, divinare, vel comminisci ausus est. Namque seu vitae necessitates, seu quietis impatiens animus, seu perturbatio status ejus, in quo permanere cuique jucundum est, eliciunt facultates, quae paratiores ad erumpendum, & magis ex usu sunt: facultates autem enodatae libidines aptas ipsis & congruentes exprimunt, explicantque. Tantum enim fere optat quisque & conatur, quantum capere se & assequi posse arbitratur insito humani ingenii vitio. Simul autem, ut eruptionem libidines faciunt, ea, quae sibi respondent, omnia, in censu bonorum habenda esse statuunt, ac deberi sibi jure optimo. Id enim omne sibi quisque a natura tri-

( IV )

tributum, additumque perverse putat;  
cujus adipiscendi facultas ab ipsa sibi  
data sit. Verum cum ea, quae cupi-  
ditas amplificata persequi potest, ne-  
que parari non adversantibus aliis,  
neque parta conservari sine labore  
queant, iccirco praecepta quaedam ex-  
cogitanda obvenerunt, quae conatus  
cupiditatis vel munirent ac tuto diri-  
gerent, vel prudenti consilio certis, ae-  
quisque finibus coercerent. Praeceptis  
enim tum maxime locus est, cum res  
non uno tenore fluunt, sed aliorum  
intercurrente cupiditate turbari, vel e-  
tiam studiis inter se cujusque pugnan-  
tibus impediri solent. Ea vero praecep-  
ta, ut varia fuere pro natura tempo-  
rum, & conditione cupiditatum evo-  
lutarum, sic induta specie varia subin-  
de, & variis e fontibus hausta sunt,  
pro cognitione rerum multiplici, qua  
mentis vis & ingenii latius expande-  
batur. Quoniam enim mens eo ma-  
gnopere delectatur, quod ita conti-  
nuatum & aptum est, ut etsi conflu-  
tum ex multis sit, interque se dissimi-  
libus, una tamen eademq. ratione ac  
forma tanquam unum quiddam com-  
pre-

( V )

prehendi possit , capropter quidquid ei propositum ad inquirendum , demonstrandumque est , cum eo comparat , quod intime novit , excoluitque maxime , similitudines exquirat , alterumque accommodat , annectitque alteri . Nostra vero cognitio exorta ab iis , quae geri in se ipso quisque sentit , & agi videt ab sui similibus , progressa primo ad ea est , quae caeteris in animantibus exposita maxime sunt , ac propter motus , habitusque varios , quibus earum subinde status immutatur , oculos , animosque ad animadvertendum acrius excitat ; viribus porro auctis evagata latius naturam omnem peragravit ; tum se se a materia paullatim abducens magnitudinum , ac numerorum rationibus evolutis , atque applicatis ad concinnitatem motuum impellentium aures , oculisque obversantium , a sensibus omnino expedita ad illud tandem , quod vere est , ac natura abhorret a concreione omni , evolavit , in coque confedit . Haud absimili progressu regendae vitae documenta deducta per gradus sunt ab hominum ipsorum factis , a naturae legibus explicatis in anim-

( VI )

nimantibus, ac rebus inanimis, ab Astronomia, Musica, Arithmetica, Geometria, Metaphysica, sensibus, imaginatione, mente ducibus, notionibus autem seu veris, seu commentitiis rerum administris.

Ex ea, quam aggredimur descriptione, tametsi pro rei magnitudine, leviter adumbrata, elucescet evolutio facultatum animi humani; ortus, & progressus opinionum atque cupiditatum, quae cum facultate aliqua seorsum ab reliquis evoluta maxime congruunt; causa demum, cur, qui se ex opinionibus atque cupiditatibus effuderunt mores, alii alii vetustiores, atque diuturniores sint. Quoniam enim explicantur sensus, ac vigent interea, dum inclusa ratio, & quasi consopita latet; atque promptiores acrioresque sensuum sunt, quam intelligentiae motus, ea propter ii citius exerunt se mores, aliusque insident, qui magis a corpore, quam ab animo participant. Ratio vero vel efferre se tempore a natura dato minime potest, occupato quasi solo asperis herbis & agrestibus, vel eodem, quo sensus ipsi aluntur, extrinse-

( VII )

fecus allapso quasi humore imbuta infici solet, vel & si adolescat, & a contagione corporis vacua, ac pura niteat, infuscari tamen eam, atque decolorari de industria necesse est, ne vulgi oculos offendat, ac respuatur a vita communi. Nam qui, cum ratione maxime polleat, ad praescriptum rationis exigi velit omnia, neque concedendum quidquam moribus usitatis putet; is si de turba se conferat in otium, & a rebus gerendis abductus unice doctrinae vacet studiis, ab aliis plane desertus sibi sapiens uni est; si turbae se negotiosus immisceat, odiosa morositate reliquos ab se removet; si demum auctoritate, & gratia valeat, importunas tempestates conciet. Quare pravitate naturae insita factum est, ut moribus imprimi quidem a ratione potuerit color quidam, ac species honestatis; non autem ejus infundi quasi succus, & sanguis incorruptus; ac tum etiam, cum virtus in pretio erat, vimque omnem, & splendorem suum explicarat hominibus intelligentibus, inter optimos annumerari fuerint ii, qui simulacra virtutis praeferebant magis

B

a

( VIII )

a popularibus vitiis diffiti, quam virtutis verae, ac germanae compotes. Nec ii, qui sapientes habiti sunt, & nominati, M. Cato, & C. Laelius, sapientes fuerunt, inquit Tullius: ne illi quidem septem; sed ex mediolorum officiorum frequentia similitudinem quandam gerebant, speciemque sapientum.

C A P U T I.

*Quo ordine facultates hominum evolutae sint, ex eisque cognatae cupiditates effusae.*

I. **Q**Uae singulis hominibus exiguo vitae curriculo a natura cuique circumscripto videmus usuvenire, gentibus ipsis ampliori temporum ambitu contigisse dicendum est. Quemadmodum enim hanc initio quisque constitutionem, ut verbis utar Tullii, confusam habet, & incertam, ut tantummodo se rucatur, quaecunque sit, sed nec quid sit, nec quid possit, nec quid ipsius natura sit, intelligit; cum autem processit paullum, & quatenus quidquid se

lib. de  
off. 3. c.  
4.  
lib. de  
Fin. 5.  
c. 9.

( IX )

se attingat, ad seque pertineat, perspicere coepit, tum sensim incipit progredi, se seque agnoscere, & intelligere, quam ob causam coepit ea, quae naturae apta senti, appetere: sic & multitudo omnis, ex qua gentes initio conflatae sunt, cum aetate quidem firma, sed imbecilla mente esset, commendatione illa prima obscura & incerta, quae a natura nostri facta est, & appetitu illo primo animi, qui co spectat, ut salvi simus, & integri, vitam omnem administrare solebat ac moderari; progredientibus autem aetatibus, sensim, tardeve potius, quae naturae vis esset, & partium singularum, dispicere coepit, & sentire, quid esset demum animus rationis particeps, & ea sequi, ad quae natus quisque est. Quo in decursu cum multa quasi diversoria, flexusque multi sint, alia alios statio remorari solet, aliusque alios error abducere. Quoniam enim, Enne.  
ad. 5. l.  
9. ut ait Plotinus, sensu antea quisque, quam mente utimur, animumque ad res sensum moventes adiicimus necessario; propterea alii quidem in hisce permanent, idque primum, & ex-

tremum expetendorum esse rati, sapientiam omnem esse hanc autumant, ut quis affluat iis, quae jucundos in corpore motus excitant non aliter affecti, atque aves ponderosiores, quae cum e terra multa sustulerint, iisque praegraventur, altius efferrinequeunt, etsi pennis a natura donatae sint. Alii vero, quos a voluptate revocat ad honesta & pulchra facultas animi potior, aliquantum ex inferioribus hisce quidem extollunt se; verum cum intueri superiora nequeant, quippe qui nihil habent, in quo consistant, una cum ipso virtutis nomine relabuntur ad earum delectus rerum, a quibus tollere se altius antea contendebant. Tertium denique genus est hominum, qui robore mentis, & acumine majore freti sustinere possunt vim lucis supernae, longeque relictis infra se nebulis rerum fluxarum, tanquam cives ex longis erroribus restituti patriae, fruuntur ea regione, quam veritas incolit, & quae natalis animorum sedes est. Inter hosce gradus, in quibus aut animus corpori plane servit, aut corpus animo, aut aequo foedere utrumque inter se distribuunt imperandi,



( X I )

di, parendique vices, alii sunt interjecti permulti, qui perinde, ut corporis, animique facultates expeditae sunt, refque suppetunt ad eas' exercendas aptae, multimodis implicantur inter se, maximamque confusionem habent.

II. Atque temporibus iis, quibus obducta quasi situ vis erat animi, ac sensibus obversabantur admodum pauca, quibus exfuscitatae cupiditates involutae, ac latentes alerentur, aspero victu, ac modico cupiditas omnis explebatur, & voluptatibus iis, quas ipsa natura libidine nulla adscititia praeter aequum exaggerata poscebat, ut augerentur vires, & generis humani perpetuitati consuleretur. Gula rudis adhuc rudibus erat contenta epulis, & fame sola conditis; neque naturam praevertebat, ut avidae voluptati pareretur, neque supervacaneis obruebat, ut inexplebili voluptati satisfaceret. Sponte nata satis ampla putabantur ad usus omnes vitae; quia parata nondum, & exprompta ratio erat agriculturae, neque artium aliarum, quae dum varietatem augent, ac docent utilitates rerum sensibus obversantium, ipsamque

( XII )

naturam in potestatem quodammodo suam redigunt , & addicunt humanis usibus , interea libidinibus irritamenta admovent,extunduntque luxuriam , quae quotidie se ipsam incitat , & ingenio adjuvat vitia ; quemadmodum egregie Promethei, Pandoraeque fabula significatum est . Prometheus enim typus eorum est , qui , proditis in lucem artibus , eximie de genere humano meruis se visi sunt . Pandora vero exprimit artes ipsas , atque cupiditates , quas illae objecto quasi pabulo multiplici , ac vario exciverunt , & perniciosas humanae genti dominas imposuerunt hactenus ad omnia mala plane rudi . Namque ita ille Caucaſo affixus ipse de se glorioſe praedicat apud Aeschylum :  
Ignem ego hominibus obtuli magistrum artium , eosque mentis exfortes prius, intelligentiae feci compotes; videntes frustra videbant , neque audiebant audientes ; sed somniis pares diu temere promiscua habebant omnia . Non latere norant ſtruere , non lignis domos , ſed incolebant ſoliſignaras ſpecus ; ſine mente agebant cuncta , donec ortus oſtendi , obituſque ſiderum . Numerum in-

Pro-  
meth.  
vincit.

( XIII )

inventorum omnium praestantissimum,  
& litterarum compositiones edidi, me-  
moriâque rerum opificem omnium.  
Primus adiunxi jugo feroces belluas,  
ut maximorum essent mortalibus labo-  
rum succedant; curribus equos fraeno  
gaudentes subdidi, superbis grande di-  
vitiis decus; neque alius a me flucti-  
vaga repperit velivola nautarum vehi-  
cula: quae vero commoda terra regit,  
argentum, aurum, ferrum, aes, quis  
ante me reperta jactet sibi? quantum  
est hominibus artis, a Prometheo est.

Quid autem consecutum ex inventis  
hiscæ sit, ut obiiceret oculis ipsis He-  
fiodus mulierem finxit, in quam ar-  
tium omnium opes, & ornamenta con-  
gesta essent. Namque Minerva lanifi-  
cium docuit; venustatem capiti affudit  
Venus; monilia corpori aurea Chari-  
tes, atque Suada circumdederunt; Ho-  
rae auricomae vernis coronarunt flori-  
bus; Mercurius demum impudentem a-  
nimum, dolosos mores, & vocem ad-  
didit. Quod simul ut oblatum munus  
hominibus fuit, ab iisque susceptum,  
dum eo sese oblectant, cupidinibus mo-  
lestis, & curis membra depascentibus

op. &  
dier. l.

5.

( XIV )

implicantur, cum vitam prius agitant seorsum a labore, aegritudine, morbis, qui senectam afferunt. Nam mulier vase resignato, quod manibus gerebat, in genus humanum effudit genus omne cupiditatum, & infinitam quandam malorum omnium vim, qui terras undique, & maria obsederunt, nulla ex iis evadendi oblata spe, quae cum evolutura jam esset, operculo imposito, repressa est, intusque una mansit. Tempus id, ut industria, sic instrumento veluptatum omni destitutum, appellatum aureum est, & mirifice nobilitatum ab iis, quos aut fastidium cepit rerum humanarum, aut inertes ac desides ab se fortuna, quae se navis elargitur, industriisque, respuit. Summa in aequalitate degebant omnes, quod occasio solertiae deesset, ac labori, cujus ope aliis aliis anteiret. Justitia terras incoluisse dicitur, quod in tanta rerum paucitate, ac sordidia cupiditatum nullus esset injuriae locus: secura fruebantur vita, ac libera, quod excitandis consiliis inter se confligentibus illecebra nulla praesto esset, neque fovendis, alendisque materies offerretur: suavissima videbantur, quae

quae temere fundebat incultum, ac silvestre solum; quia ne conjectura quidem assequi poterant, quae fructuum suavitates ex humo subacta, ac parata ad satus accipiendos elicerentur: iis denique bonis oblectabantur, quae tenuissimis in rebus, & paratis inscientia meliorum, & inertia ac desidia nullo neque aestu interiore, neque incursum extraneo excitata afferre poterat; qualia tribuuntur a Pindaro populis Hyperboreis. Nam convivia dulcia cu-Pythion.  
rat gens foliis cincta recentibus, quam<sup>X</sup>.  
non lethifer inficit morbus, non senium debilitat tremens; nec Mars sanguineus quatit; aut exosa scelus numina territant.

III. Sed ignavia haec excussa cito est, creptaque felicitas ea, quae vacuitate magis incommodorum, quam accessione bonorum continebatur. Nam parcissimo victu, ac durissimo plurimum corpori firmitatis, ac roboris ingnebatur; animusque cultura, ac disciplina nulla mitigatus effervescebat iniquies & indomitus. Siquidem incultae parsimoniae fere est integra valetudo comes, ac robur immane, & audax.

in Ma-  
crobiis. dax. Quare Lucianus populorum quo-  
rumdam vitam ad senectutem summam  
perductam victui, quo temperato &  
agresti utebantur adscribendam putat :  
I. de-  
abst. 4 atque apud Porphyrium Dicaearchus nul-  
lum, ait melius, neque ad sanitatem in-  
corruptam, ac diuturnam accommoda-  
rius esse consilium, quam ut a corpore  
redundantia arceantur. Quidquid enim  
supervacuum est, aut frangit vires, aut  
ab opera incremento corporis, ac firmi-  
tati partium danda avocat in depellen-  
dis, egerendisque noxiis occupatas.  
Nervos autem, atque lacertos valentio-  
res diritas quaedam ac feritas affecta-  
tur, nisi cultura leniat animum, & vi-  
res licentia nimia superfluentes compri-  
mas. Nempe, ut est apud Platonem,  
In Po-  
litico. quemadmodum pudore & verecundia  
demissus animus, expertusque fortitu-  
dinis, & audentiae segnior sensim fit,  
ac demum obtorpescit omnino quasi stu-  
pore quodam debilitatus; sic incitatus  
contra, ac vividus, nisi modestiae per-  
mixtus apte, congruenterque temperetur,  
ac retundatur, firmata primo quasi stir-  
pe, robore, nervisque viger; ad extre-  
mum autem undique fundit insaniam.  
Quo-

( XVII )

Quocirca Aristoteles instituta Lacedaemoniorum eo nomine condemnavit , <sup>I. Polit. 8. c. 4.</sup> quod in labore ac duritia plus aequo exercitati homines offerarentur .

IV. Agrestibus igitur , horridisque viribus instructus , & ad irarum ardorem , ac pertinaciam paratus animus impetum primo omnem effudit in feras belluas , a quibus intendi periculum capiti , vel cibus , ac tegumentum peti posset : deinceps invasit in homines ipsos , si quando ab iis importuno ventri , ac libidini , quae fines a natura positos urgere coeperat , impedimentum afferretur . Quare cum saepe jurgii , rapinae , caedis arrepta , & oblata causa esset , consuetudine ea sensus omnis humanitatis oppressus est : atque cum nihil in homine praestantius agnoscere-tur , quam robur corporis impetu quodam animi concitatum , praeclarum illud existimari coeprum est , ac Diis genito , Deoque ipso futuro dignum , quod immanissimum esset , & atrocissimum . Nam , ut inquit Polybius , si <sup>Hist. l. 1.</sup> qui forte adversantur effraenatae cupiditati cujuspiam , nihil adeo crudele ac nefarium est , quod hic in se non fuf-

aequius se, modestiusque gerat, quam imperii magnitudo flagitet, id eo facere, ut sese ingenio attemperet humano, tutiusque sibi alios obsequentes habeat. Sed moderatio haec inuenta consilio prudenter utilitati serviente prorsus ignota temporibus iis erat, quibus ira peragebantur omnia. Quapropter immanitate efferatis animis, ac ferocia exultantibus, frustra ab calamitosis, afflictisque religionis pietas, & vis communis humanitatis obtendebatur, ne vivi, spirantesque devorarentur, vel a canibus, alitibusque mortui discerperentur. Stultus es, inquit Cyclops, qui me Deos vereri jubes: neque enim quidquam curant Cyclopes Jovem; quippe qui robore longe antimus: neque Jovis ira deterritus tibi, sociisque parcam, nisi me jusserit animus. Et Achilles Hectori morituro, atque, ne corpus ad sepulturam negaret, obsecranti, ferarum esse eum jam morsibus, unguibusque addictum denunciat; incusatque segnitiam doloris sui, qui non eundem in frustra concideret, & membra fluentia tabo manderet.

Olyff.  
l. 9.

Iliad.  
l. 22.



( XIX )

mansuetum postulet , ut sensus communis humanitatis explicare se distincte & ordinate possit ; illa contra cum fero , agresti , perturbato consuescat libens , robustissimi quique contentionibus crebris , ac rebus prospere gestis alacriores facti conquiescere non poterant abs rebus novis moliendis , ut recenti se praeda conlocupletarent , & ingenio inservirent , cujus erat agitatio major , quam ut unquam tranquillitatis & otii desiderio capi posset . Quae vel praedat libido , vel animi concitati insania , cum saepe non haberet inter suos magnum satis ad excurrendum spatium , crumpebat in aliena . Quare latrociniis infesta omnia facta , mutatae subinde sedes , neque certa cuiquam statio . Nam si quis praesertim in eo solo consedisset , qui vel ubertate frugum , vel opportunitate aliqua in oculos incurreret , ab ingruente grassatorum manu diripiebatur , aut exturbatus sedibus suis domicilia nova quaerere cogeatur . Neque vis ea , quae se , quo cupiditate , animique impotentia raperetur , impetu coeco proruebat , crimini , ac probro erat ; sed , ut ex anti-

ti-

- Hist. l. 1. ti quis poetis Thucidides collegit, etiam  
 1. laudi tribuebatur. Illos enim, qui ul-  
 tro, citroque navigant, ab iis, quo-  
 rum ad oras appulerint, interrogari  
 faciunt, num latrones sint, & praedas  
 acturi venerint. Ac neque ii, qui ro-  
 gantur, tanquam indignum negant,  
 neque tanquam turpe exprobrant ii,  
 Odyss. l. 3. quorum hoc nosse interest. Hospites,  
 ait Nestor Telemacho, ac sociis, mercatu-  
 rac ne causa, ac praedae maris traji-  
 citis incerto cursu, more praedonum,  
 qui periculis anima objecta damnum  
 alienigenis inferunt? Siquidem inge-  
 nium praeceps, & indomitum neque  
 majus quidquam praestare posse, ne-  
 que propterea magno excelsoque ani-  
 mo convenientius esse autumat, quam  
 quod ingenti conatu fit, & cum mul-  
 to labore conjunctum est: ac si quod  
 arduum est, utilitates etiam praecclaras  
 afferat, is qui viribus omnia metitur  
 corporis, sese non injuriam iis facere  
 putat, quos immerentes aggreditur,  
 sed ab eisdem injuria affici, si repu-  
 gnare audeant, & obniti potentiori.  
 Quo vitio animi humani turbulento  
 corporis actu jactati factum est, ut  
 vio-

( XXI )

violentiae tributum sit jus summum ;  
atque receptum , id cuique fas esse ,  
quod quisque posset ; neque aliud quid-  
piam detrahi sibi pati oportere , quam  
quod vis , ac necessitas extorqueret .  
Quae lex a feritate orta cum sensim  
amplitudinis cujusdam , ac dignitatis  
speciem induisset , a barbarie ultima pro-  
pagata est ad id usque temporis , quo le-  
gibus aequis dominari ratio videba-  
tur ; ac mitigata immanitate , quam tum  
praeferebat , cum vix quidquam praesta-  
ret animus , quam ut homines essent inter  
se feris ipsis damnosiores , conservavit  
robur , ac vim , quae non ut ante cu-  
piditate tumultuaria in actum educebatur ,  
sed utilitate callide provisa tem-  
perabatur ; & intendi solebat , ac re-  
mitteri pro ut res , ac tempora , quibus  
erat accommodanda , postulare vide-  
bantur . Quare legati Athenieniensium  
in concione Lacedaemoniorum aperte  
professi sunt rem esse perpetuo na-  
turae jure constitutam , ut imbecil-  
lior qui sit , a potentiore coerceatur ;  
neque ullum extitisse , qui si vires  
& copiae suppeterent , acquirate retar-  
daretur a rebus augendis : ac si quis  
ac-

Thuc.  
li.

( XXIII )

VI. Quare, cum parum admodum infirmioribus esset in justitia praesidii sive ad praecavendas, sive ad avertendas injurias, quibus inferendis animi ardentiores immanissime saeviebant, rebus adversis excussa vis quaedam insita exsiluit, qua animorum imperus humanitate expertium eluderentur. Solertiam enim quandam, atque sagacitatem emisit animus undique pressus, quae se se acuens, ut ea tempora ferebant, quibus tam inculta mens hominum erat, & infirma, quam corpus exercitatum, atque corroboratum, insidias, eruptiones, propugnacula, fallacias excogitavit, ut qui viribus esse pares non poterant, incursum hostium a se calliditate quadam, amolirentur, aut retardarent. Quae quidem calliditas, quod hominis esset palam prodire non audentis, ac de se timentis indicium, erat iis odiosissima, qui roboris invicti laudem unice quaesitum ibant, ac nihil tam cavebant, quam, ne parum sibi confidere, caeterosque contemnere viderentur. Quapropter Ajax ille, qui se neminem extimescere profitetur apud Ho-

*Iliad.*  
l. 7.

C

Ulys-

Ulyſſem, qui auctor erat, ut quae vi non poterant auferri tela, fraude furriperentur; quia turpe id eſſet viro bono. Nam boni tum vocabantur, qui viribus, animiſque praeſtarent. Cum vero ab ſe paullo ſeducus homini vaſro annuiſſet, mox ad ingenium redit, incoeptumque repudiat, ne dum ſapientiae laudem quacrit, eſſe bonus deſinat. Nam, ut bonus appellabatur, qui periculum nullum detrectaret; ſic ſapientis ei nomen factum eſt, qui dolos aptos tempori callide ſtrueret. Quare Minerva, quae ſapientiae, quaſi forma eſt, ſe ſe cum Ulyſſe conferens: tu quidem inter homines, inquit, praeſtantiſſimus es conſilio, & fallaciis; ego vero inter Deos omnes conſilio fraudibusque polleo.

Odyſſ.  
l. 13.

VII. Eſi vero calliditatem comitem vis initio reſpueret, utilitas tamen utramque deinceps foedere junxit, & alteram alteri ſaepe conciliavit. Quapropter in rerum gerendarum partem aſtutia recepta eſt; & cum antea turpe duceretur quidquid vi non eſſet effectum, ſua laus etiam conſilio tribui coepit: quod eſi conatus rerundat,

## ( XXV )

dat, impetumque sufflaminet roboris,  
 viam tamen planiorem ad res diffi-  
 ciles, ac tutiorem parat. Immo vero,  
 cum necessitas identidem in partes om-  
 nes se se versare mentem cogeret, e-  
 jusque prolatae in medium opes aperte  
 monstrarent, robur hominis exiguum,  
 ut aiebat Euripides, esse, si, cum so- At.  
 lertia multiplici conferatur, qua do- Plutar-  
 mat omnia, quae terra, pontus, & ch. in  
 aer alit; eapropter absolutus is, & lib. de  
 perfectus habebatur, qui manibus esset solert.  
 bellicosus, & consilio potens. Anim. Hom.  
 Quam- Od. 16.  
 quam autem ad res magnas expedien-  
 das astus afferret adjumenti plurimum;  
 is tamen necessitate magis, quam insi-  
 ta dignitate commendatus est, ac nisi  
 audacia tegeretur, ipse per se despe-  
 ctui erat, atque dedecori. Quare post-  
 quam vis astu hominum in artis mo-  
 dum redacta est; is praesertim, qui  
 staturam Oarioneam a natura non tu-  
 lisset, laude merita minime fraudaba-  
 tur, si cum viribus majorem haberet  
 animum; quae subsidia latera, lacer-  
 tique denegabant, ab astutia peteret,  
 ac interea, dum, ut Pindarus inquit, Istm.  
 audacia leonem referebat in labore od. 4.

graviter frementem, astu vulpem imitaretur, quae dorso incumbens aquilae cohibet, avertitque impetum. At iis maxime, qui dignitate eminent, ac florerent opibus, turpius esse putabatur uti fraude speciosa, quam vi manifesta; quippe cum existimaretur, alteram, ut Brasidas apud Thucydidem non diffitetur, jure potentiae, quam fortuna dedit, inferri; alteram ab injusti propositi insidiis proficisci: quasi aequum, esset id alios pati, quod alterius exaequata cum potentia libido ingerat; ac potentia viribus externis ita expleatur, ut nihil ad eam quidquam ingenium acre, & versatile conferat.

VIII. Quae vero calliditas armata prodibat, cum vires aetate corroborata abundarent, aetate deflorescente minor facta in eam, quae moderata est, atque a ratione profecta prudentia, desinebat. Nam, cum animus esse in tranquillo coepisset, qui se huc illuc antea versabat, & ardore cupiditatum una cum sanguine, ac spiritu refrigerante multa persequi cogitatione posset, contentionum, atque inimicitiarum motus turbulentos cum ea vita comparans leni,

( XXVII )

nī, ac placida, cujus aetas ingravescens  
desiderium aliquod afferebat, intelligere  
facile poterat, iram eam esse laudabilem,  
qua tuta pax, & honesta pararetur;  
qua vero dissidia, pugnae, clades, ac  
rerum everfiones perpetuarentur, eam  
esse vituperandam, & a natura alienam.  
Alteram enim sanguinis esse quasi  
fervorem quendam excoquentis admixtum  
cruditatis quidpiam; alteram autem hominis  
tanquam febre naturae vires exuperante  
laborantis insaniam. Quocirca sese ad ea  
suadenda contulerunt, quibus a ferina  
consuetudine, & odiis internecinis ad  
mansuetudinem homines, & amicitiam  
traducerentur. Sed Iliad.  
l. 1.  
neque Nestoris, cujus ex ore melle dul-  
tior fluebat oratio, sedata consilia lenire  
furentem Achillis animum poterant; ne-  
que Ulyssis, qui verba nivis hibernae Iliad.  
l. 3.  
similia fundebat, eloquentia sese leniter  
insinuans in exulcerato animo penitus  
insidentem iram exorare, ut aliquando  
mite quidpiam admitteret. Nam surdo  
canit, qui cohibendos in pectore spiritus  
elatos esse, quod humanitas praestabilior  
sit, iis persuadere conatur, qui cum viribus  
plurimum



( XXVIII )

possint , extimescantque neminem ;  
aeque ducunt indignum animo forti ,  
& magno tradere se prudentissime com-  
monenti ; atque hosti contra ruenti  
succumbere.

IX. Verum quod efficere nondum  
poterat eorum auctoritas , & sententia ,  
qui provecti aetate essent , aliisque con-  
silio praestarent , efficere tandem even-  
tus ipsi rerum , qui sensim immites  
ad lenitatem mores converterunt , at-  
que a vitae ratione tumultuosa , & in-  
fecta traduxerunt ad eam , quae justi-  
tia magis , & mente regeretur , quam  
cupiditate , atque animi motibus pertur-  
batis . Velenim assidua contentione de-  
bilitatis ultro e manibus arma excide-  
bant : vel aequatis iterum , ac saepius  
repulsi viribus , infecta re cogebantur  
ab incoepto desistere ; vel fracti adeo ,  
ut vires , animique deessent ad res repe-  
rendas , humana , ac divina omnia vi-  
ctoris arbitrio permittebant , ne frustra  
repugnando penitus interirent . Quare  
sublata dimicandi causa , quietem ali-  
quam agere coegerunt feroces animos ,  
atque vincendi cupidos : ac dum con-  
citatio subsederat , sive studio , sive  
tem-

( XXIX )

temporibus accommodato consilio ducti , cum effunderentur omnes in eorum obsequium , quos propter insolentiam otium diu pati non posse providebant , in eosque congererent undique signa omnia , quibus excellentia quaedam , & potestas eximia coli , placarique potest ; tandem factum est , ut hisce delinimentis eorum quasi consopitus furor languori se daret ; animusque flecteretur ad ea studia , quae rebus parvis adhiberent culturam aliquam , ne , qui fructus ex iis capi poterat , exaresceret . Nam cum antea contentus animus laxaretur honoribus habitis , otioque retenderetur , per ea , quae dabat intervalla , facile sese prudentum monita insinuare poterant , ut legibus intestini compescerentur motus , hominesque certarent officiis mutuis alter alterum demereri . Cujus quidem conjunctionis , atque conspirationis animorum utilitate percepta , coepit ea diligere ab ipsis iis , quorum a moribus inveteratis maxime dissidebat . Usu enim , ac sensu ipso interiore compererunt , etsi ratio obticuiisset , jucundius esse , tutiusque , & homine dignius ab suis

coli beneficio devinctis , quam timeri a laceffitis injuria , caeterisque anteire dignitatis ornamenta omnia sponte deferentibus , quam invitis per vim imperare , metuque adigere ad extrema quaeque commovenda , ne fit iis turpiter serviendum , aut inulte pereundum . Qui vero temperatiore animo essent , evasissentque incolumes ex jactatione tanta , quid expetendum tantopere , tamque magna cura tuendum existimare poterant , quam vitam degere terrorum vacuum ; nulla ingruente nefariorum manu exturbari de sedibus ; nullo rerum tumultu a studiis , institutisque suis avocari ? Tum , quasi edolata asperitate ea , quæ ferinam antea naturam praeseferebat , fortitudinis ea forma exculpta est , quae mores humanos decet . Tum justitia , quae rerum moribus turbulentis oppressa nondum emerferat , libere caput extulit , & quae vi pulsa nuspiam habuerat consistendi locum , publica in luce versari , summamque dignitatem , atque auctoritatem aliquando tenere coepit . Tum porro ingenia expoliri , educique artes , ac disciplinac , quibus ani-

( XXXI )

animus excoleretur , ac vitae commoda , civitatis opes , & ornamenta dignitatis augeri solent .

X. Sed interea dum legibus , ac judiciis aequi , bonique jura commununtur , ex altera parte facultates rerum , & industria confluentium utilitatum incitamentis extimulata paullatim ea invehunt omnia , quibus justitiae fundamenta succutiuntur , & ei maxime infesta discordia , ac seditio cupiditatum alitur . Ita enim fere accidit , ut animi securitas vitae tranquillitati succrescat ; securus animus effundat cupiditatum segetem ; cupiditates industriam exacuant ; industria multiplicet ea , quibus ambitiosae voluptates , & sumptuosae mirifice variari possunt ; usu vero voluptatum exhauriantur opes , obsolescat pudor , exultet improbitas , avaritia divina cum humanis permisceat , pecunia summam auctoritatem habeat , omnia perrumpat vis ; exundante denique colluvie cupiditatum omnium dejiciantur leges , quae propugnacula sunt , ac muri civitatis , & licentius grassantibus moribus malis , honesti , ac decori semina penitus obruantur .

Nam

( XXXII )

Nam victu , & cultu a necessariis ad elegantiora defluente relaxari temperantia solet , animique fortitudo debilitari ; sensimque adnascitur alteri luxus confector , & consumptor omnium , alteri corruptrix ambitio bonarum artium , quae nihil simplex , atque sincerum esse patitur : quae si quidem ignavum hominem inertemque occupent , languidis illum voluptatibus liquefaciunt , & inani magnificentia sumptuum effusorum clatum in eam inducunt opinionem , ut summo loco natis ad laudem , & claritatem unam hanc esse viam reliquam , ac decoram putet . Quare cum antea summa praestantissimorum hominum virtus , ac laus esset magnus exantlatus labor ,  
*l. r. op. ac vigeret effatum illud Hesiodi : non*  
*& dier.* *est operose quidpiam moliri dedecus ,*  
*sed nihil omnino agere dedecus est ;*  
*postquam ex animi torpore nata fo-*  
*cordia splendorem quemdam , ac di-*  
*gnitatem a divitiis mutuata est , vir-*  
*tutis occupavit locum , ac praecipuum*  
*fortunarum amplissimarum coepit ha-*  
*beri decus . Sin autem luxus , & am-*  
*bitio callidum invaserint , & ad omnia*  
*fusci-*

( XXXIII )

fufcipienda paratum , erectumque animum; tunc ea monftra pariunt , quae defcripta a Nepote , Tullioque legimus , ubi nobis expreffam ille quidem Alcibiadis effigiem , hic vero Catilinae exhibet . Alter enim verfare fuam naturam , atque huc , & illuc ita torquere poterat , ut idem cum triftibus fevere , cum remiffis jucunde , cum fenibus graviter , cum juventute comiter , cum facinorofis audacter , cum luxuriofis libidinoſe viveret : alter autem ad omnes res aptus , confiliique plenus erat , difertus , dives , laborioſus , patiens , liberalis , ſplendidus , affabilis , blandus , temporibus callidiſſime inferviens , idemque luxurioſus , diſſolutus , intemperans ; ut omnes admirarentur in uno homine tantam eſſe diſſimilitudinem , tamque diverſam naturam . Cujus quidem generis homines peſtilentiſſimi ſunt , quod eorum vitia ſpecie quadam illuſtri virtutis aſſimulatae non obtegantur modo , ſed etiam illuminentur , atque ad omne genus hominum capiendum conformata flagrantes libidinibus animos illecebranativa alliciant ; graves , & ſeveros adſcita virtutum indo-

Tul.  
Orat.  
pro  
Coel.

Corn.  
Nep.  
in Al-  
cib.

( XXXIV )

indole concilient ; popularia denique ingenia admiratione coeca obstupefacta detineant . Luxuria vero divitum , & ambitione potentiorum alitur eorum avaritia , quibus aliena vitia lauta quaestui sunt ; & audacia facinorosorum invalescit , quibus neque res , neque spes ulla bona domi est : quorum genus alterum nihil sani in moribus esse , alterum omnia permisceri juvat . Nam qui lucrum ex obsequio turpi , & artibus malis aucupatur , quo vita communis solutior est , eo paratorem , ac latius patentem arbitratur ad quaestum esse sibi reclusam viam ; & cum ex aliorum perditis moribus occasionem capter praedae , omnibus omnia pro libidine licere , sua magni referre putat , ut aditus ad inservendum iis plurimos habeat . Quare impurus ille apud Plautum : boni , inquit , viri me pauperant , improbi alunt , augent rem meam mali : populi strenui damno mihi , improbi usui sunt . Qui vero pacatis rebus , & optime constitutis non nimis habet , quid speret , & consequi possit , ei fraenum omne licentia solutum esse prodest , ne desit  
occa-

Iu  
Pseud.  
act. 4.  
sc. 7.

( XXXV )

occafio nova moliendi; neque magis ille quidquam expetit, quam, ut complures fint, qui flagitio, egestate, ac re alieno exagitati non inveniant, unde libidinibus sumptus suppeditent, nisi vi res geratur omnis, & dux praesto fit ad facinus audax, cujus & in praefidio lateant, & incoepta viciffim summa ope adnisi fulciant. Quare cum ad optimi rerum status dissolutionem voluptarii libidines; quaestui dediti, & alienis inhiantes iniquiffima foenora, ac lenocinia; ambitiosi factiones, & corruptelas; audaces, & egentiffimi vim, atque desperationem afferant, paullatim fit, ut oppugnatis undique moribus bonis, & vinculis omnibus revulsis legum, atque judiciorum in licentiam immoderatam universa denique prolabantur.

XI. Conversiones ergo rerum humanarum gradibus hisce progrediuntur, promovente facultate illa animi, quæ maxime expedita rerum potita est. A rudi victu, ac duro, quo robur alitur, ad eam vitae rationem gentes deductae sunt, in qua ferocitas, & versutia confligunt inter se, resque vi  
pera-



peraguntur , & infidiis impotenti furore communitis . A ferino statu hoc rerum , quo dominatus occupari solent , ad cum porro devehuntur , qui fortitudine nititur , & prudentia ; rebusque partis tuendis , ac turbulentis ordinandis , accommodatus est . Hanc deinceps excipit optima civitatis constitutio ea , quæ justitia regitur , ac devincta continetur legibus ; & cum otio abundet , atque opportunitates maximas habeat ad opes augendas , excolendasque artes , capropter ad omnes vitæ commoditates , atque jucunditates percipiendas imprimis idonea est . Otio vero confirmato , fortunis auctis , & vitæ commodis , ac deliciis multiplicatis cupiditas exaggerata laxare legum fraena nititur ; ac justī , & aequi munimenta omnia concutit adeo , propellitque , ut aestuantem cupiditatem ea continere minime possint .

XII. Homerus , qui , ut rerum naturam , quæ sui semper similis est , æquabiliterque fluit , carminibus inclusit suis , ita mores , qui commutantur idem , ætatum omnium congeffit , in unumque tempus contulit ,  
ut

( XXXVII )

ut ex conflictu morum inter se maxime diffidentium eventus existerent admirabiliores, ingenii humani progressus a duritie prima ad extremam dissolutionem expressit in viris principibus, & gradus omnes alterum alteri continuatos distinxit, atque sub uno aspectu posuit. Nam, ut omittam immanitatem, quae ferarum omnino est, Polyphemo attributam; Achilles typus est invicti roboris, animique impotentis; Ulysses astutiae violentia suffultae; Nestor prudentiae fortitudine animi sustentatae; fortitudinis Hector, & justitiae; justitiae Antenor, imbellisque prudentiae; Paris demum libertatis effusae, suaeque libidini posthabentis omnia. Duces alii, ac proceres interjectos explent gradus, quibus hi, qui extant maxime, connectuntur.

XIII. Status autem hi pro varia, sive locorum, sive hominum indole rerum casibus intercurrentibus variis immutari multimodis, interque se complicari possunt: & mores, ac leges populorum, quae exortae ex hisce sunt, eisque incrementum fere debent, easdem, atque ipsi, mutationes habere solent.

( XXXVIII )

lent. Nam iis, quorum res est angusta domi, ingenium pingue, corpusque valens, cultus diu, victusque asperitas adhaerescit, quam fere comitantur agrestes, incultique mores. Cum iis autem, qui animis ardentiores sunt, ingenioque praediti acuto, ac versatili, diu ferocitas consuescit, quam fraudulentia pene sequitur, & labore fatigatam alterna vice mollitia sinu fovet, relaxatque penitus; ut qui patientior in periculis est, effusior idem esse in otio soleat in voluptatum illecebras. Quibus ea demum quasi temperatio animi obtigit, ut ab extremis aequae virtutibus ardentioribus absint, ac vitiis, hi cum rationem exsolvant maturius animi motibus concitatis, res etiam sedatius inter se comparare, momentisque suis diligentius ponderare possunt. Quare viget in iis prudentia, rerumque scientia bonarum, ac malarum, eique iustitia, ac vera magnitudo, & excelsitas animi comes additur. Nam, qui consilio reguntur, & corporis, animique motus natura moderatos habent, hi facile virtutum sunt germanarum compotes; cacteri vero vel  
igno-

( XXXIX )

ignorantia vitiorum innocentes sunt ,  
vel impetu animi confuso incitati si-  
milis quaedam virtutibus expromunt .  
Duorum enim generum superiorum in  
altero temperantia nihil est aliud ,  
quam naturalium , quae paucissimae  
sunt , appetitionum sensu ipso dimensa  
expletio ; fortitudo viribus solis cor-  
poris nititur ; iustitia vix alia cogno-  
scitur , quam quae rudi cupiditate se-  
data , patitur alios habere , quod usui  
sibi non est ; prudentia denique pro-  
pter eventorum rebus in exiguis , ru-  
dibusque cupiditatibus paucitatem vix  
ullum locum habet : in altero vero  
temperantia est abstinere voluptatibus  
iis , quae convenire minime possunt in  
animum , qui sui plerumque impos est ,  
& in utramque partem effraenate ruit  
ira aequae , ac luxuria immodicus ; for-  
titudinis ea conari , quae proxima fe-  
ritati sint ; iustitiae , quos bonis ever-  
teris omnibus , iis omnino spiritum non  
adimere , vel si nullam conditionem  
recusent durissimae servitutis , urgere le-  
vius , idque facere , quod non aufe-  
ras , servitii pretium ut sit ; prudentiae  
denique , quos vi non possis , eos do-

D            lis ,

lis, & insidiis labefactare. At postre-  
mi generis temperatus ille est, qui  
animum avocet ab affectionibus iis,  
quae cum ratione, ac praestantia na-  
turae humanae minime congruunt; for-  
tis, qui rebus altius fluxis, & in ar-  
bitrio fortunae positis exerat caput,  
ac neque adversis debilitetur, neque  
laetis efferatur immoderate; justus, qui  
neminem laedat, idque omnibus attri-  
butum velit, quod humanitatis insita  
jura, legesque ex iis descriptae volue-  
rint esse cuique suum: prudens tan-  
dem, qui rerum casus humanarum ani-  
mo prospiciat, eaque providentissime  
comparat, quibus hi praecaveri pos-  
sint, aut emendari. Quoniam autem  
de rebus ad vitam pertinentibus ita  
judicatur, ut animus affectus est (af-  
fectionibus enim animi opiniones obsi-  
gnari quodammodo solent) propterea  
quae fortitudo ab iis dicitur, qui ra-  
tione gubernantur, animi demissio vo-  
catur ab iis, qui feritatem ex animo  
nondum excusserint: mores ad huma-  
nitatem exculti, remissi appellantur,  
& effeminati; quod injuste, ac dolose  
factum est, id tanquam ab animo  
vasto,

( X L I )

vasto , & alta cupiente , sapientiaque  
elationi suae pari praedito susceptum  
facinus collaudatur. Ubi vero cupidi-  
tates artificio nequitiae omnis eruditae  
nudum rationibus veris , honestisque  
studiis animum occuparunt , ac petu-  
lantes opiniones , & sibi cognatas inve-  
xerunt ; tum , ut ait Plato , verecundia , l. de  
temperantia , sumptuum modus appel- Rep. 8.  
lari stultitia solent , ignavia , rustici-  
tas , illiberalitas ; contra vero petulan-  
tia nomen obtinet ingenuae , liberali-  
terque educatae indolis , licentia liber-  
tatis , prodigalitas magnificentiae , im-  
pudentia fortitudinis .

XIV. Ex hisce fontibus effudit se  
prolues ea morum , quae rationi vi-  
tium attulit , ac virtutum quasi surcu-  
los in illa abditos oppressit , aut de-  
pravavit ; aliisque subinde influenti-  
bus , quasi torrens auxiliaribus aquis  
aucta libere in caput , fortunasque ho-  
minum , & vitae cultum debacchata  
est. Quid autem auctoritatis , & pon-  
deris habere potest , ut ex ea natura  
aestimanda sit hominis , ac de rebus ex-  
petendis , & mentis , atque rationis prae-  
stantia dignis judicandum ? Tunc enim

( XLII )

exorta est , cum ratio quasi consopita torpebat , vel motibus animi turbulentis agitata distrahebatur , vel sensuum illecebris enervata contabescebat . Ut vero primum fuit vel explicandi , colligendive sui , vel convalescendi spatium rationi datum ; hi , qui mores , quos erant forte nati , adamarant , aut se se ad eos aptarant , meliorum desiderio consuetudine mitigato , vel represso terroribus iis , qui res mollientibus novas , & ab usu communi abhorrentes obversari solent , magnitudine incommodorum adducti reprobari , refigique usitata instituta debere intellexerunt . Nam , ut aeris pondus , qui circumfusus nobis est , ex quo editi in lucem sumus , sensu interea non attingimus , dum aequabiliter undique premimur . Sin autem moribus insolentibus agitato firmissima quaeque concutiat ; vel in orbem convolutus suis quasi spiris illiget obvia , revellatque ; tum quae vis ejus sit , & quid ab eo detrimenti importari possit , experti discimus : ita qui nati , & educati moribus fuerint a ratione dissentaneis , cum meliores , quibuscum ii con-

( XLIII )

conferantur , praesto non adsint , improbitatem eorum forte non animadvertunt abducti consuetudine quotidiana ; multiplici vero perturbatione rerum , quae cum moribus ab honestate dissidentibus increbrescit , expergefacti tum demum institutorum studio tanguntur , quibus ea tolli damna possint , & imperium rationis dominatu cupiditatis excellentius esse prospiciunt , ac salutaris . Quam ob rem Cyrenenses luxu perditum Platonem sapientiae laude celeberrimum rogaverunt , ut novas sibi leges conderet ; ac Soloni rerum summam detulerunt Athenienses , ut mores componeret civitatis agrestes , & efferatos . Siquidem ea rerum a natura dissentientium ratio est , ut speciem fucatam utilitatis , qua se cupiditati commendarunt , tandem aliquando gravissima damna redarguant : quidquid autem ad honesti leges , ac decori conformatum est , quo cupiditati magis adversatur , eo tutius , utiliusqueprehenditur usu diuturno .

Plutar.  
ch. in  
lib. ad  
Princ.  
inerud.

Ael.  
Hist.  
var. l.  
l.8.c.10

XV. Neque vero putandum est , etsi mores absconi quidam usu obtinuerint , probatos eos aequè fuisse omnibus .



( XLIV )

Non enim ad eadem omnes aequè propen-  
si sunt; neque siquem legum con-  
ditores dissimularunt, aut etià præ-  
scripserunt, iccirco laudasse eum, vel  
praeferendum censuisse ipsum per se  
judicandi sunt. Nonnullos enim to-  
lerarunt, ne medicina adhibita præmatu-  
ra medicinae impatiens malum exaspera-  
retur: quos aegrius evelli posse praevide-  
bant, excoluerunt, ut alii facilius  
eradicari possent: quibusdam honores  
decreverunt, ut à contrariis homines  
avertentur, in quos essent natura  
proniore: aliquos omnino tentare non  
potuerunt, quod interposita religione  
pro corruptione animi varia varie de-  
formata prohiberentur. Germanis præ-  
das a finitimis avectare licebat, ut ju-  
ventus exerceretur, ne desidia langue-  
sceret. Lacedaemoniorum legibus sup-  
plicio deputabatur non qui furtum  
fecisset, sed qui fuisset in furto de-  
prehensus, ut essent alacriores ad præ-  
cavendas insidias, callidiores ad eas-  
dem parandas, ac doloris inflicto vul-  
nere patientiores. In Aegypto, quia  
tollì omnino furta non poterant, id  
unum lator legum conatus est, ut in  
ordi-

Caes.  
l. 6. de  
bel.  
Gall.

Plutar-  
ch. in  
Lycur-  
go

Diod.  
l. 1. c. 3

( XLV )

ordinem aliquem cogerebatur. Quare lege cautum fuit, ut qui latrocinari vellet, nomen in albo inscriberet, & quae furrupisset, eundem in locum omnia comportaret, ut quod fuisset quisque suppilatus, ei persoluto quadrante recuperandi potestas esset, Quanto vero studio raperentur homines ad fraudem faciendam bonis alienis, id ex ea lege constat, qua, qui mutuum quidpiam sumere vellet, creditori parentis caput obligare cogebatur; ut si fidem fallere satis ipsum per se turpe non videretur, accessione flagitii summi deterreretur. Cum stulte alii crederent homines in vitam hanc exilii causa venire, alii mortuos eisdem oblectari, quae vivi adamassent, alii Deos ea re praesertim exorari, & coli debere, quae praestantissima in terris esset; ideo pium, ac religiosum videbatur Scythis obtruncare patentes annum sexagesimum praetergressos; Sardibus neci dare verberibus antea contusos; Gallis servos, & clientes concremare, qui domino vita functo, cum viveret, fuissent cariores. Nuptis Indicis inter se certare, ut una cum-

Id. ib.

( XLVI )

viro comburerentur ; Gallis , & Germanis ad avertendam iram Deorum captivos excarnificare ; Persis ad habendas Diis gratias vivos , spirantesque terra defodere ; Tauris hospites immolare ; Phoenicibus ornatos cultu regio pueros nobiles ; Albanis hominem sanctissimum , sacris initiatum , & cute laute curata nitidum . Qui foedis imbuti religionibus Venerem colebant propudiorum Deam , iis , qui persuaderi posset , illa in turpibus , habenda esse , quorum haberent auctores Deos ? Quare Babylonicae mulieres religione ductae diebus statis ad Veneris templum tandiu desidebant , quoad hospitum confluentium aliquis injecta pecunia , quae Veneri sacra erat , & recusari minime poterat , oblatoque vitio potestatem abeundi cuique faceret . Quod excellens quidpiam esse muliebris formae pulchritudinem mores ad mollitiem lapsi quibusdam persuasis-  
sent , feminis Indicis perhonorificum erat elephantem danti copiam fecisse sui , magnitudine pretii formae praestantiam quamdam indicante singularem ; & Aegyptiae , quae multos ad se pellexissent ,

Eurip.  
in Ione

Herod.  
l. 1. c.  
199.

Arr. in  
lib.  
Rer.  
Indic.

Sext.  
Emp.  
hyp.  
Pyrr.  
l. 1. c.  
14.

( XLVII )

sent , insignitae perisphyrio incede-  
bant . Limirni , & Agathyrsi tan- Nicol.  
quam in Platonis Republica communi- Da-  
bus utebantur uxoribus , ut inter se mase.  
germani , quemadmodum ait Herodotus ap.  
& cognati omnes , neque sibi vicissim Stob.  
invidiam facerent , neque in se mutuo ferm.  
certarent odiis . Qui demum vel pro- 44.  
pter incultos mores , vel animum aequo Herod.  
superbiorem caeteros ne homines qui- l. 4 c.  
dem putant , neque commune cum his 104.  
quidquam habere volunt ( quae Persa-  
rum arrogantia fuit , Herodoto teste , Herod.  
qui se quam optimos arbitrabantur , l. 1. c.  
alios autem eo deteriores , ac nequio- 134.  
res , quo ab se abessent longius ) hi  
vel impetu coeco , vel insolenti con-  
temprione gentis humanae coniecti in  
nuptias nefarias abrumpunt adminicu-  
lum id , quo longius exporrigi socie-  
tas humana potest . Quare apud Ho- Odyss.  
merum Aeolus filias dabat filiis , ut l. 10.  
essent uxores ; & Cambyfes , ut idem  
Persis liceret , exemplo suo fecit . Im- Herod.  
mo vero regis inter Arabas cujusdam l. 3. c.  
filia infimulata probri est a fratre , 31.  
quod alio genere natum admisisse ad Strab.  
se putaretur , isque signo posito ad eam l. 16.  
in-

( XLVIII )

ingredi vetaretur, & fratrum caeterorum neminem intus esse certo sciret.

XVI. Quae causae perversitatis morum cum tam variae sint, tamque inter se colligatae, & implicitae, quam variae, variisque viribus animi facultates humani se se explicare possunt, atque conspirare inter se, vel a se mutuo disfidere; pravitatis, & inscitiae homini adnatae patrocinium absurde susciperet, qui nullam esse facultatum earum constitutionem, & quasi structuram optimam affirmaret, sed in ea quemque permanere posse, quam forte nactus inter suos est: omnia recte moribus, institutisque patriis administrari; neque vitae rationem ullam esse perpetuam, constantemque posse, quod una cum rebus aliis homines immutentur, ac mores alios postulent. Necessarium enim esse quasi systema quoddam facultatum ex omnibus apte respondentibus inter se coalescens, ex ea seditione maxime patet, quae, cum sibi contrariae cupiditates inconsulte, ac temere permiscantur, in animo commovetur, & a Dione Prusaensi oratione de Regno quarta descripta est. Nam cum  
vitae

( XLIX )

vitae status , in quos homines impetu magis , atque casu , quam certo consilio delati incidunt , in tres potissimum tribuisset , voluptarium , avarum , & ambitiosum ; atque cupiditates , quas Genios cujusque vocat , ac singulis duces praeficit , accurate poetarum more , & modo depinxisset seorsum alteram ab altera ; saepe , inquit , duo , vel omnes una Genii sortiti sunt hominem eundem , pugnantes inter se , maximique damni cujuspiam denunciatione pro se quisque terrentes eum , qui sibi deneget obsequium , ut alteri morigeretur . Voluptarius in ea , quae sensum aliquem jucunde moveant , omnia profundere jubet ; avarus contra retinet , ac minatur , cum se fame , siti , egestate , si paruerit alteri , confecturum . Rursus ambitiosus instat , urgetque , ut ille se , fortunasque suas honori , & gloriae devoveat ; contra parcus idem , & lucri appetens injecta manu retrahit . Neque vero concinunt inter se voluptatis cupidus , amansque gloriae . Contemptor enim laudis alter est ; nugas agere putat eum , qui dignitati studeat ;

mor-

mortemque objicit oculis, qua ingruente nullius est quisquam deinceps jucunditatis particeps; alter autem absterret a deliciis, atque luxuria, dedecoris oblato, probrique metu. Nesciens ille quid faciat, aut quo se vertat, se se crebro ex hominum conspectu surripit, aufugitque in tenebras, ut sine teste libidini pareat; sed ambitio latentem reteggit, abstrahitque in medium. Animum igitur huc, illuc abreptum, distractumque, & secum semper pugnantem ad extremum fieri necesse est omnino miserum. Nam, ut morborum semet implicantium, interque se contrariorum difficilis, & anceps cura est; sic animus, ubi cupiditates variae fortuito commiscentur, & intus inclusae discordant invicem, acerbissima molestia, & aegre sanabili incommodo conflictatur. Qui porro systema illud facultatum nostrarum aptum, atque cohaerens ex moribus populi constitui posse putat, qui non hominis cujuscumque sapientis inventum sunt, sed vitae, ac temporis, ut inquit auctor praefatus, is profecto non intelligit, nihil a consuetudine ulla firmi, circum

cumscriptique finibus certis expectari  
 posse . Nam , ut idem scriptor an-<sup>Orat.</sup>  
 madvertit , consuetudo nulla com-<sup>Rhod.</sup>  
 prehensione devincta , neque definita  
 est . Quare , cum in dies apponatur  
 ad eam quidpiam , serpit illa sensim  
 longius , & progreditur , perinde ac  
 ulcera quaedam , quae manant in dies  
 latius , & increbrescunt . Neque vero  
 legibus , etsi a viro proficiantur , cujus  
 exprompta maxime ratio sit , ea corrigi pe-  
 nitus , & in gyrum rationis adduci potest ;  
 ut quod lege sanctum est , illud ha-  
 bendum omne sit optimum , & hone-  
 stati convenientissimum . Latoribus enim  
 legum etiam sapientissimis id accidisse  
 dicendum est , quod ipse de se confi-  
 tetur aperte Solon ; qui , cum rogare-  
 tur , legesne optimas perscripisset  
 Atheniensibus , optimas , inquit , ea-  
 rum , quas accepturi erant . Siquidem  
 homo prudens , ac moderatus vereba-  
 batur , ne , si Rempublicam undique  
 miscuisset , infirmior esset , quam ut  
 eam constituere ex integro , atque ad  
 optimam rationem conformare posset .  
 quae vero seu cohortando , seu vim  
 adhibendo , quam pati poterant , im-  
 petra-

Plutar-  
 ch. in  
 Solo-  
 ne .



petraturum se confidebat, ea convenienter inter se vi, iustitiaque compositis aggressus est, utilius rebus humanis capiens, aptiusque consilium vir-experientissimus, quam rerum formis undique perfectis assuetus Plato, qui vocatus ab Arcadibus, ac Thebanis, ut Dialog. civitati recens conditae leges poneret, Laert. l. 3. secundum bonum iis tantum abnuat, quod ab gm. 23. aequabili partitione bonorum abhorre-  
re eos intellexisset. Qui demum verentur, ne si legi rationis immutabili velint obstrictum hominum genus, quasi Prometheum quemdam indissolubili vinculo affixum Caucaeso obtrudere videantur, ii dum normam nullam certam ponunt, quacum vitae ratio omnis congruere debeat, sed omnia casuum incertorum temeritati deferenda putant; quemdam quasi Protheum invehunt, qui scenae servire sciat, quodque fuerit esse subinde desinat, atque ignoret hodie, quis sit cras futurus, quidve sibi iudicaturus bonum. Ji sane, quibus id unum, propositum est, ut apud quoscumque sint, habeantur carissimi, praecclarum quidpiam, & pulchrum ducere possunt, Alcibiadem illum,

Corn.  
Nep.

( LIII )

lum, quem color omnis decere visus in Alcibi.  
est; quippe qui splendissimos Arhe-  
nensium splendore ac dignitate vitae  
superarit, cum Athenis esset; Boeo-  
rios magis firmitati corporis, quam in-  
genii acumini servientes labore, corpo-  
risque viribus Thebas incolens anteie-  
rit; Spartae Lacedaemonios, quorum  
moribus summa virtus in patientia po-  
nebatur, parsimonia victus, atque cul-  
tus omnes vicerit; Thracas homines  
vinolentos, ac ventri deditos in his  
rebus antecesserit; Persarum, apud  
quos summa laus esset fortiter venari,  
luxurioseque vivere sic imitatus con-  
suetudinem sit, ut illi ipsi eum in his  
maxime admirarentur. Sed indifferen-  
tia ea, qua fit, ut honestum, vel tur-  
pe quidpiam ex eo dicatur unice,  
quod opportunum, vel intempestivum  
sit, si longius aequo protendatur,  
atque pertingat ad ipsa principia ea,  
quae prima a ratione prodeunt, & in  
ramulos quasi sparsa multiplices ad  
singula pertinent, quae recte geri,  
praveque possunt, ex homine mon-  
strum fit, quo nullum unquam tetrius  
finxit infinita licentia poetarum. Nam  
si,

-LIV )

fi , quae feritas , avaritia , luxuries , ambitio protulerunt , in unum omnia congererentur , ac poetarum more , qui multa similitudine quadam inter se convenientia contulerunt in unam formam , ac Jovem , Prometheum , Herculem fabricati sunt , humanum genus in hominem unum contraheretur , ei-que mores aggererentur ingeniorum , actatum , ac regionum omnium , quam prodigiosa , quam incondita , quam dissonis , interque se pugnantibus ex naturis coagmentata species exoriretur ! Quidquid in fabulis ex diversis animantium studiis conflatum prodigii est , si congregatum unco veluti impacto cohaerere cogeretur , tam foedum , horrendumque visu non esset portentum hoc , ac moribus obducta natura hominis adeo foedis , & ominosis . Quaecum abhorreant ab intelligentiae praesentia , & rationis , quae dux , & praeses homini data est ; immutabile quidpiam oportet , ac simplex esse , cujus ad similitudinem consilia mens , ac mores dirigat . Quapropter , etsi res , quae materia constant , omnes fluxae sint ; & homo ipse qua parte corpus est ,

( L V )

est , mutationi tempore omni subja-  
ceat , atque , ut ait Epicharmus , natu- In Exc.  
ram quisque variet , neque statu in Grot.  
uno maneat , sed idem sit rursus aliud  
illi , quod nunc transit : ratio tamen ,  
qua differt a rebus aliis , constans est ,  
ac vitae leges , quae manant ex ea ,  
perpetuae sunt , & unius modi semper ,  
ac sui similes . Illa quidem occultari  
saepe , ac describi potest . At si prodeat ,  
ac sententiam rogetur , eadem semper  
consulenti responsa dat , eademque de-  
creta facit . Nam ratio humana , quae  
circa vitam , & victum semet occupat ,  
nata est ex ratione Dei , quae artis Epich.  
est opifex , & comes omnibus , edo- ibid  
cens ipsos , quid usus maxime facto  
fiet . Quippe homo non repperit artem ,  
sed dat hanc auctor Deus . Nempe  
mens divina leges continet aeternas  
rerum , & in omnia pertinentes ; nostra  
vero quodammodo consignatam ferens  
ipsarum quasi partem eam , quae ad re-  
ctam facultatum humanarum administra-  
tionem spectat , & in omnia ducitur ,  
quae fieri ab homine possunt , dum in-  
ructur in hanc , & occasione data proces-  
sus ejus attente persequitur , ubi quid  
E deli-

( LVI )

deliberandum fit , quid in singulis rebus  
deceat , intelligit . Interdum quidem  
fit , ut quemadmodum venae , quae a  
corde profectae funduntur in corpus o-  
mne , prae nimia imbecillitate oculorum  
obrutum fugiunt , cum extimas in par-  
tes corporis definunt ; sic ubi ventum  
est ad actiones eas , quae minimi mo-  
menti sunt , vix ulla sit mentis acies ,  
quae rationis eo pertinentis internosce-  
re distincte praecepta queat . Sed haec  
infirmiitati mentis nostrae venia danda  
est , ut impune minima quaedam vel  
agere inconsiderate , vel imprudentia  
praeterire possit ; quippe , quae tanti  
non sint , ut ea non contemni socie-  
tatis humanae permagni referat . Immo  
vero quoniam illecebrarum omnia ple-  
na sunt , multae patent ad errorem  
viae , multi praesto sunt ad fraudem  
duces , multae propellunt in praeceps ,  
animumque distrahunt cupiditates ,  
detur aliquid moribus , detur insito  
ingenii vitio , detur illi suavitati hu-  
manitatis , qua delectantur homines ,  
& quam qui repudiet , ei Deos iratos  
putant , dummodo qui cupiditati quid-  
piam indulserit , excusatione , quacumque  
possit , .

( LVII )

possit , utendum sibi intelligat , minime vero profiteri audeat fecisse id se , quia liceat . Fateatur id ratione non annuente , sed connivente factum ; quae cum veritati adhaerescat , omnium , ut ait Plato , Diis , hominibusque bonorum <sup>l. de</sup> duci , stabilitatem eandem habet , at- <sup>Leg. 5.</sup> que ab omni cupiditatum , opinionum , morum levitate , inconstantia , temeritate , perturbatione sejuncta est ; neque probare quidpiam potest , quod ab aequabilitate , & constantia moderati , rectique animi abhorreat .

C A P U T II.

*Qua ratione , & via de rebus ad  
vitam pertinentibus opiniones  
emortae sint .*

I. **Q**Uemadmodum ex evolutis hominum facultatibus variae cupiditates ordine pullularunt ; sic & opiniones de rebus expetendis ad easdem accommodatae prodierunt ; atque , ut morum , ita errorum series infinita quaedam ex multis continuatis , aliisque alios apprehendentibus connexa

( LVIII )

est . Nam judicia , quae de rebus feruntur , ex affectione animi cujusque profuunt , & affectionibus roborantur conspirantibus aliorum , quos inter est quisque situs . Ut enim quisque affectus est , ita de rebus judicat ; at si judicia ea , cum fere nihil ipsa per se firmitatis habeant , aliorum judiciis eodem annitentibus minime contingantur , facile diffuunt , & evanescunt . Sin autem consentiant multi , visaque lineamentis iisdem conformata proferant , singuli conferentes inter se commenta sua , conjectant ex ea similitudine , quae cernitur inter ipsa ; non ludificari se specie aliqua inani ; sed ipsam rei cujuspiam concretæ , ac solidæ formam in visis iis intueri . Ex quo fit illud primo , ut homines ea summa censeant , quae maxime congruere secum ; & exaequari putant . Nam se quisque Protagoræ more rerum omnium quasi mensuram arbitratur , ut qualia cuique singula videntur , ei talia reapse sint . Quare metienda ducens ex se ipso omnia , eo quidque majus esse statuit , quo propius id ab illo abest , quod ipse capere potest maximum ,

Plato in  
Crat.

( LIX )

mum. Ubi vero vel adeptus quis est, vel adeptum se opinione stulta retur, quae capacitatem explere suam possunt, nequaquam existimat esse sibi factum satis, ea si magni faciat solus; sed operam dat, & enititur, ut alii pariter ipsa illa summo in pretio habeant. Quo enim magis admirantur, atque suspiciunt ea, quorum ipse potitus est, eo pluris aestimari se necesse esse videt.

II. Ut quis igitur de se judicet, ac de rebus extra positis, se nequaquam in se ipso quaerit, sed in iis; quibus undique circumfunditur imaginibus vanis; seque inspicit in ea iudicia, quae caeteri larvis eisdem obvoluti de ipso ferunt, adscita specie illa contexta, quae fallaci, turbidoque splendore fucum facit animi quasi peruersis oculis, & humore suffusis. Quamobrem iis, qui praestigiis ejusmodi corrupti sunt, & inter homines eisdem corruptos positi, ferme id accidere necesse est, quod esset illi obventurum, qui non integris, & incorruptis instructus oculis in aede speculis varie coloratis, ac figuratis undique obdu-



eta medius locaretur . Hic enim quo-  
 quo se verteret , membris se colore  
 novo subinde infectis , & varia for-  
 ma praeditis , varieque junctis in-  
 ter se coagmentatum intueretur . Si-  
 lus , flaccus , fronto , capito , strabo ,  
 varus , valgus momento temporis ef-  
 fet ; eique se nunc miris modis distor-  
 ta , nunc apte etiam , ac venuste  
 conformata species objiceret . Ille vero  
 avertens oculos ab imaginibus iis ,  
 quae deformem aspectum habent , hae-  
 reret in iis , quae lineamenta pulcher-  
 rima , floremque pigmentorum suavis-  
 simum praeseferunt ; ac praesertim , si  
 plura specula formam pulchritudinis  
 eandem reddant , eam sibi fidentius tri-  
 bueret , ex eaque de se judicaret ; re-  
 liquas autem figuras , etsi quaequam si-  
 militudinem sui gerat , a se constanter  
 abjudicaret , ac tanquam oculorum lu-  
 dibria contemneret . Haud absimili  
 modo praesertim is , qui plurimorum in  
 oculis habitat , & in excelsa locatus e  
 media turba eminet , omni ex parte  
 circumseptus est multitudine hominum ,  
 a qua varie exprimitur , effingiturque du-  
 ctibus linearum , & coloribus iis , quos  
 cupi-

( LXI )

cupiditates, & ingenium cujusque sup-  
peditare solent. At inter aequa, & ini-  
qua judicia, quae de se fieri videt,  
ea despicit omnia, quae sibi minime  
favent; quae contra maxime amplifi-  
cant opinionem eam, quam de se im-  
bibit, ea vera putat, in iis defixus  
haeret, sese ex iis aestimat, ac rebus  
aliis, quae extrinsecus applicatae, &  
adjunctae splendorem augent, & ma-  
gnitudinem. Imperator enim, qui mi-  
litum virtute, ac viribus, imperio,  
ductu, & auspicio suo vastarit agros,  
hostium vim fuderit, gentes terrore  
compleverit, urbes ceperit, & praeda,  
agro, adorea populares affecerit, quan-  
docunque de se cogitat, se non in-  
tuetur unum, sed ut imaginem sibi  
fingat sui, cogitatione, & mente com-  
plectitur milites dicto audientes, prae-  
lia confecta, transmissa flumina, regio-  
nes victoriis peragratas, provincias in-  
ditionem redactas, monumenta, mune-  
ra, triumphos, omnemque posteritatem  
res gestas legentem suas. Quae dum illi  
obversantur omnia tubarum sono, cla-  
more militum, acclamationibus ci-  
vium obstrepentia, se se hominem ef-

( LXII )

se obliviscitur; neque animum advertit, se, quamquam caput inferat nubibus, & illa parte sui populo secernatur, pedibus insistere solo, populoque permisceri parte hac. Qui vero pauca admodum habet, quae se illi e proximo offerant, ejusque speciem reflectant magnifice illuminatam, oculos ad ea porrigit, quae longe ab se remota sunt, & exangui, ac evanida imagine ea mirifice delectatur, quae remitti a rebus situ obsitis e longinquo potest. Id ii faciunt imprimis, qui sibi claritatem atavorum adsciscunt, eaque una se se late splendescere posse arbitrantur, etsi nitor imaginum fumosarum, siquis ad hos permanare possit, intercapedine tanta extenuetur, umbrisque interpositis obscuratur adeo, ut ne discerni quidem possit, aspectumque plane fugiat. Demum siquis externo adjumento omni destitatur, seque se involvat uno, is bombycum more quoddam sibi quasi tegumentum texit, ac nova subinde quasi pictura interpolat, ex eoque se spectat. Etsi vero opinio sui, quam pro lubitu ornavit, omni momento deferatur,

( LXIII )

ratur, quod a comprobatione, consensuque aliorum adjici solet, ei tamen adhaerescit, eandemque firmam, ac stabilem esse retur; caeteros autem vel stultos praedicat, qui recte propter inscitiam judicare nequeant, vel invidos, qui propter animi perversitatem limis oculis intuentes omnia depravent. A deo Chilonis illud, nosce te ipsum, a communibus moribus amandatum est; quo praecepta tria contineri docet in Philebo Plato, nimirum, ut se quisque cognoscat, & sua, & quae suorum sunt: sive, ut Porphyrius *Serm.* apud Stobaeum explicat, internum pri-<sup>21.</sup>mo, & immortalem hominem; tum umbratilem illum exteriorem; ea demum, quae ad utrumque pertinent: nempe mentem, in qua existit id, quod homo appellatur; corpus hoc obiectum sensibus, quod umbra cujusque dumtaxat, & imago est; corpori denique circumjecta, quorum facultates scire debemus, ne partis immortalis dignitas mortali tribuatur, aut mortalis utilitates traducantur ad immortalem.

III. At plerique consensione quadam

( LXIV )

dam incredibili partem suā potiorem eam esse putant, quae sensuum instrumentum est, quod hujus sit evolutio prior, & usus in vita frequens, eaque afficiamur vehementer omnes : quae contra intelligentiae, ac rationis particeps est, ea prope confunditur cum vanis imaginibus iis, quas a corporibus fluentes olim somniavit Epicurus . Nam, etsi haec intima nobis inhaereat, ac plane coelestem vim, & naturam habeat, minus est tamen familiaris, exerciturque serius, & leniores, quam sensuum, motus cogitationis sunt. Rerum autem externarum esse illas excellentiores autumant, quibus incitatus promoveri solent; & majores, quae latiore occupant quasi locum in animo perturbata mentis agitatione quodammodo inflatae, velut aqua subditis ignibus effervescentes. Quare missis rebus ipsis imagines earum contuemur, admiramur, amplectimur; ex his bonorum genera definimus, in species tribuimus, ordinamus, vimque singulis, ac naturam assignimus, Quibus constitutis quandoque de bonis, ac malis decernendum quidpiam est, id plane facimus, quod

quod olim philosophi quidam solebant, cum physicis de rebus esset sermo institutus. Nam, ut hi vocibus excogitatis universalibus quibusdam, ad quas referri oportere statuerant quidquid de rerum natura quaeri posset, ex his interrogati promebant interpretationes suas, ratiocinabantur ex his, & ablegata investigatione naturae, scientiam omnem terminabant apta, & artificiosa collocatione verborum, quae rerum in locum substituta tractari commode poterant; ita bonis, eorumque gradibus descriptis ex simulacris iis, quae a sensibus inchoata vis imaginandi perfecit, & expolivit, cum deliberandum est, quid appetere oporteat, alterive praeferre, non ea quidem convenientia spectatur, quae rerum nobiscum est, sed exquiritur unice, qua ratione comparata sint inter se fragmenta illa, quae nostri, ac rerum ipsarum vicaria successerunt.

IV. Primum autem, quod esse sibi plerique expetendum constituerunt, illud est, ut objecto impedimento nullo voluptati obsequi possint. Jam tum enim, cum facultates aliae consopitae

tor-

torpent , aut involutae latent ; sensus  
viget expeditus , per quem ea se ultro  
nobis etiam imprudentibus insinuare so-  
let . Impedimenta vero in homine ipso,  
vel extra sunt . In ipso imbecillitas  
est , pravitasque sensuum ; extra ipsum  
inopia rerum earum , ex quibus vo-  
luptas capitur , vel earumdem usui vis  
obstans illorum , quos inter est quis-  
que positus . Quare , tanquam admi-  
nistrae voluptati adjunguntur integri-  
tas sensuum , affluens copia rerum earum , quae sunt ad sensus accommodatae , & potestas perfruendi rebus ipsis  
arbitrio cujusque suo : primum videlicet , ne quasi substratus desit , qui voluptatis efficientia recipiat ; alterum , ne recipienda quasi materies absit ; tertium denique , ne receptio ipsa pracludatur :

V. Quia vero carendo magis , quam  
potiundo sentimus ; quam commoda  
nobis ea sint , quibus opinione aliqua  
conciliati sumus , quippe qui boni cu-  
juspian intermissi cupiditate diutius in-  
cendimur , ne quid in animo quasi va-  
cuum , hiansque sit , quam retenti lac-  
titia , quae sensim languescit usu , ef-  
fera-

( LXVII )

feramur ; facpius autem externa defunt nobis adjumenta voluptatis , quam sensus ipsi , quorum etsi vis in aliis alia sit , expletio definitur ea capacitate , quam quisque ab initio nactus est ; iccirco se crebrius exerit , erumpitque acrius cupiditas libertatis , & opum , quam incolumitatis corporis . Quae quidem cupiditas quanto vehementius exardescit , tanto etiam voluptatis ipsius , cujus causa succrevit , extenuat , absumitque cupiditatem ; ac sensim fit , quod animis praefertim elatis accidit , ut ea dominetur una , voluptasque divitiis cedat , ipsaeque divitiae libertati serviant .

VI. Sed cum saepe contingat , ut eadem multi aeque cupiant , idque eo crebrius evenire necesse sit , quo plures inter se vicini sunt , & finitimi ( omnibus enim earundem facultatum exercendarum appetitus idem inest ) nulla vero rei cujusque finitae magnitudo tanta sit , ut cupiditatem omnium infinitam partita expleat ; propterea , si aeque omnes possent , a caeteris eodem concurrentibus repelleretur quivis unus , qui transferre ad se quidpiam seorsum vellet



( LXVIII )

let ab aliis. Quamobrem , cum libertas , quae viribus omnium exaequatis nititur , sese tueri possit inter eos tantum , qui vel inertes omnino sunt , & se perpetuo languori tradunt , vel ad ea studium omne contulerunt , quae cum iis , quae sensus movent , nihil plane commune habent ; eapropter in omnibus , qui viribus , animisque vigent , amor libertatis adnascitur appetitio dominatus ; aliisque potestate antecellere summis in bonis annumeratur ; & in eundem censum venit , quidquid vel principatum imitatur , vel quidpiam ad ipsum conferre potest.

VII. Ea porro potentia viribus est comparanda vel propriis ejusque , vel conspirantibus aliorum , unaque consociatis . Vires autem cujusque propriae continentur robore corporis , industria , solertiaque mentis , & vehementia quadam motuum eorum animi , quibus ad res arduas inflammari , perque invia , praerupta , & septa trudi solemus alacriores . Tanto enim magis quisque valet , quanto rapitur incitatus ad expromendas facultates suas ; ipsaeque facult-

( LXIX )

cultates majores sunt ; quanto nempe quidquid objectum difficultatis est , contentius invadere , callidiusque cavere potest . Quapropter multos olim latera , lacertique nobilitarunt , ac summo studio celebratae dignitatem quamdam habuerunt exercitationes eae , quibus agilitas , firmitasque corporis augetur , animique pararentur ad contemptum dolorum , ac rerum terribilium despicientiam . Deinceps vero perspicax sive prudentia , sive calliditas , qua rerum gerendarum vel adjumenta quaeri , vel impedimenta dispelli quoquomodo solent , tanti facta est , ut ea laude quicumque excelleret , proximus is Diis ipsis haberetur , & eorum putaretur interiore congressu frui .

VIII. Verum , cum quantacunque vis ea sit , qua quivis unus instructus est , exigua admodum existimari debeat , si cum aliorum omnium , qui resistere possunt , viribus conjunctis conferatur ; iccirco nulla neque magna potentia comparari , neque conservari diuturna potest ab eo , cui se plurimi non addixerint . Alios autem , ut conitantur nobiscum , inducere fere solent  
inco-

incommodi metus, aut utilitatis spes, aut opinio praestantiae cujusdam eximiae, quae non usitata specie aliqua percellat oculos, & magna quaedam, multisque profutura polliceatur. Praeclare itaque nobiscum actum arbitramur, si multi nos aut metuunt, aut amant, aut magni faciunt: eaque signa omnia delectant, & splendoris aliquid habere videntur, quibus aliorum magna de nobis opinio significari solet; eoque laudis, & honoris, & dignitatis existunt acerrimae cupiditates.

IX. Atque nos ut metuant infensos, ea efficiunt, ex quibus conflare vires cujusque diximus, ingenium audax ad omnia capeffenda, mentis acumen versutum, ac solers, nulla in labore corporis, animive defatigatio, & quae fere consequuntur haec, confidentia minax, jactatio arrogans, praeceps, impotensque furor. His quidem, mansueti qui sunt, facilesque moribus adversari non audent absteriti metu quodam injuriarum, & interdum obsecundant, ut incommodis levioribus extrema damna redimant: qui vero natura vehementes, ac feroces sunt, ultro

ultro se adjungunt spe ducti ea perficiendi, quae repugnantibus illis audere periculosum esset. Nam, quae maxime nocent inimica, si foedere aliquo devincta forte nobiscum sint, maxime profunt. Omnes autem diligimus praesertim eos, qui cum facile possint in alios esse injuriosi, bonitate naturae quadam adducti beneficiis potius, quam vi plurimos obstrictos sibi tenere student; nobisque ipsis praesidium certum munire nos, & ornare arbitramur, si eos augeamus, iisque defera-  
mus operam omnem, qui cum opibus abundant, non has quidem ad oppressionem seu fortunarum, seu libertatis infirmiorum conferunt, sed civium vel afflictorum auxilio, vel florentium dignitati, vel universorum in theatro, & spectaculis oblectationi expositas esse; patentesque volunt. Eos denique solemus admirari, qui, vulgo quae rimentur, aut avide cupiuntur, contemnunt, ac negligunt; aliisque seu concedentes, seu parantes etiam, ac tuentes ea, quae sunt utilitatis alicujus, aut voluptatis efficientia, fructum laborum nullum quaerere videntur praeter

ter laudem, & gloriam. A qua cum plerique se procul abesse videant propter inopiam adjumentorum eorum, quibus ea sustinenda est, vel se ultro abdicent occupationibus iis impediti, quibuscum ea consuescere minime potest, non modo non invident aliis possessionem eam, quae usui minime sibi est, sed addici etiam hanc ipsi, latissimeque continuari sua magni referre putant. Quis enim ea re, quae, cum a se trasferatur ad alios, nullum sui desiderium relictura sit, remunerari nolit utilitates illas, quibus aegre carere potest; easque virtutes invitus alat, a quibus uberrime bona illa funduntur, quae vita ipsa sibi cariora sunt?

X. Ex his, quae ad potentiam, opesque magnas plurimum valent, metus ad patientiam, obsequiumque demittit; admiratio consuetudine laudum effusarum assentationem parit, quae turpissimum servitii genus est; expectatio commodorum ad amicitiam allicit, clientelas adjungit, adnectitque propinquitates. Quae cum potentiam nulla vi cuique facta augeant, ob eam causam praesertim magni fieri solent,

&

( LXXIII )

& cum habeant amplitudinis , ac dignitatis speciem quandam , ipsa per se magna videri possunt . Quia vero quanto vetustiora sunt haec , tanto radices altius egisse , latiusque fudisse necesse est ; iccirco generis antiquitatem rebus gestis majorum , qui procul a temporibus absint nostris , nobilitatam excellens aliquid esse remur ; ac tanto huic arctius adhaerescimus , quanto , remota quae sunt , invidiae minus subeunt , eique praestantiae dignitatis , qua quis eminere velit e caeteris , favetur magis , si specie quadam vetustatis oblecta in vulgus prodeat , quod ea tum non adscititia quidem , aut aliis callide praerepta , sed a natura ipsa tributa quodammodo videatur . Homines enim , ut praesentibus invident , ita procul a se disjunctos efferunt ; & quod illis avare negant , aut eripiunt inique , largius in hos , auctiusque profundunt . Nam finitimis quidem quantulumcunque accesserit incrementi , verentur , ut magis emineant , quam ut se e regione positos videri magnum aliquid sinant ; immo vero male sibi cautum putant , si quid iis aut labris aspersum , aut insita

( LXXIV )

de laude limatum non fit : quod imprimis tum accidit , cum rebus suis subdiffidunt , vel earum rerum quibus ipsi valent , jacere pretium , seu stabile , ac certum nondum esse constitutum vident . Procul autem a nobis diffitis quantacunque tribuantur , metuit nemo , sibi ne quid officiant . Longius enim absunt hi , quam ut secum conferri queant ; ad eosque amplificandos quisque mirum in modum pronus est , ut eosdem removeat ab se , quam maxime potest , & cum iis sibi ne contentioni quidem relinquatur locus , si non insanus haberi velit . Nam certare cum iis , qui quodammodo conditionem humanam praetergressi sint , incoeptum audax habetur , insaniaeque conterminum . Quare cum de rebus antiquis iudicium ferendum est , id his quodammodo accidit , quod imaginibus e laterna megalographica prodeuntibus ; quae tanto latius exporrectae cernuntur , quanto sunt longius impedimento obiecto interceptae . Hanc autem proclivitatem hominum obscuritas ipsa temporum adjuvat . Nam ut Nilus flumen ideo sanctius olim habebatur ,  
de

deque illo mira omnia fingendi potestas erat cuique data, quia fontes ejus in abdito delitescabant; ita quo generis occultior origo est, ac magis a memoria omni recedit, commentum nulum respuens eo fidentius admittit, quidquid admirabilitatem aliquam afferat, ac Diis ipsis locet finitimam. Hinc ut decorum, pulchrumque visum, ita gentibus usitatum fuit a temporibus notis primordia sua remove, atque in obscura conjicere, quo augustiora ea facerent, & pigmentis fabularum in tanta caligine luce nulla dissipandis illuminarent.

XI. Et si vero habeant haec magnitudinem quamdam, impleantque oculos; tamen languescunt quodammodo, nisi quidam ea motus animet, ac novus identidem splendor instauret. Nam, ut imago e longinquo emissa quo latius funditur, eo diluatur magis necesse est, atque vivacitati subtrahatur, quod est amplitudini adjunctum; ita quae commendatio, & auctoritas a majoribus propagatur, si praesidiis aliis destituta sit, suppeditare quidem ad ostentationem aliquid potest, habet au-



tem ad potentiam nervorum parum . Quare ut in ea sit plurimum & splendoris ad oculos multitudinis percellendos , & momenti , ac ponderis ad permovendos animos , illuminanda divitiis est , quae sumptu , & magnificentia prodeant , aut exfuscitanda contentione orationis , & facultate dicendi , cuius est admiratio maxima in populo , ufusque plurimus ; aut roboranda virtute , & consilio , quae factis illustribus declarata sint , & in conspectu posita .

XII. Ac primum quidem , si copiae suppetant , cum facillimum est , tum vero ad popularem laudem accommodatissimum . Nam etsi plerumque soliditatis ei subfit nihil , quod a levitate quadam , atque temeritate proficiscatur , tamen eam speciem habet , qua mirifice delectari vulgus , & capi solet . Magna enim illecebra est opinio munifici animi , splendideque pecunias effundentis ; ut is etiam , ad quem utilitas nondum ulla pervenerit e sumptibus iis , diligat illum , deque illo multa honorifice praedicet ; quippe qui fructum , quem nondum cepit , jam

con-

( LXXVII )

conjectura praecipiat ; cum paratum illud omnibus , & commune perfugium existimet . Ac si sumptus eas in res facti sint , ex quibus accedat ad civitatem insigne decus , tanto id celebrant magis , quanto sibi quisque gloriosius esse putat extare quidpiam inter suos , quod oculos exterorum alliciat , & adventantibus ostentari magnifice possit . Duorum autem posteriorum ratio quidem , si fluat ab homine motibus animi vehementibus agitari solito , torquentis instar obvios quosque abripit , abreptosque circumagit . Ac si forte incidat in ea tempora , quibus homines impendentis mali terrore dejecti , vel dati spe rerum novarum sint , nihil ea potest exoprire opportunius . Nam qui sonantibus verbis , uberibusque sententiis meliora fidenter animo pendentibus , afflictisque polliceatur , & bene sperantibus , ad audendumque projectis assentetur omnia , se se in sententiam ejus ultro rejiciunt ii , qui conciderunt animis , erigique cupiunt ; seque ei magna voluntate committunt , quibus jam excitatis dux opus est . Rerum vero gestarum magnitudo sive

fortitudinis, & prudentiae, five felicitatis opinionem ingenerat. Nam si gradus sint omnes explorati, per quos eventa progrediuntur, ea consilio, & industriae tribuuntur illorum, quibus rem gerentibus obtigerunt, tantumque singulis existimationis, & laudis rependitur, quantum ad ea quisque operae contulit. Sin haec implicata sint nimis, & progressus lateant, adscribuntur ignotae potestati cuidam, quae fortuna dicitur; iisque sese tradunt homines alacritate, ac studio summo, quibus ea, quam omnia posse putant, adfuerit saepe comes. Quare tum disertis, tum laboriosis, ac fortunatis honos est maximus a multitudine, quam non habitus, quod illi speciem quamdam utilis, ac robustae sapientiae secum in scenam afferant; hi vero nervos, & vires ad res gerendas applicent, & favorem erga se, studiumque rerum humanarum gubernatricis, ac dominae praeferant.

XIII. Sed cum eloquentia popularis impetum quemdam, & fervorem animi flagitet, quo commovere alios, & impellere valeat arbitrato suo, rerum  
autem

( LXXIX )

autem inquisitionem penitiorum neque sustinere mens insolentibus agitata moribus, neque in rebus agendis occupata multitudo ferre possit; isque fere sit ad assensiones in populo crebras exci-  
randas aptissimus, qui rerum a populi sensu abhorrentium contemplationis impatiens est; hinc eloquentiae, sapientiaeque verae, ac solidae factum est discidium; ac disertis, qui dominari in concione vellent, sapientibus amandatis ad umbracula ab omni celebritate seposita, dum hi semoti stultas opiniones emendare nituntur, easdem ipsi callide fovant; utque vulgi studia aucupentur, colore omni illitas admovent ad coetus hominum; ac tanto prudentiores habentur, & cariores sunt, quanto recedunt minus a judiciis iis, quae cupiditati moribus usitatis inditae favent.

XIV. Tamen etsi scientia rerum abditarum a negotiis communibus repudietur, & a populi sensu longe distincta sit, aditus ei quidam relictus est, quo possit arreperere ad vulgus ipsum. Hic autem ducitur ab admiratione ea, quae rerum difficilium, ac  
recon-

reconditarum opinione commoveri solet, si quo cultu splendido, minimeque ignoto illustratae prodeant. Nam, ut est in Bacchis Euripidis, tenebris majestas quaedam adest. Hinc eorum, qui se doctrinae studiis unice dediderunt, opera non equidem vulgus utitur, quod ea parum conferat ad illa paranda, quae sibi utilia arbitratur; neque propterea labores umbratiles rebus iis remunerandos, ornandosque censet, quae negotiosis hominibus, industriisque putantur adjudicatae; sed tanquam excellens quidpiam digito monstrat, & honore quodam, atque veneratione dignatur, tanquam Epicuri Deos in intermundiis illis suis otiosos, & sua sapientia, ac virtute gaudentes.

XV. Ea vero propensione, qua communiter homines adducti suspiciunt res inusitatas, otioque eo, quod ex doctrinae laude potentiam, & opes quaerentibus plus, quam vellent, concessum est, abutentes quidam, ea saepe consecretantur, ut admirabiliores appareant, quae vel difficilem cognitionem habent, eandemque prorsus inutilem, vel novitate aliqua, dum mentem excitant, iudicium ever-

evertunt, animumque corrumpunt. Nam quo semotiores a caeteris aetatem agunt, ac sibi relictī per omnigenas idearum series errare liberior, expeditiusque possunt, eo magis ab aliis, ut usu, & prudentia rerum, sic opinionibus ac sententiis plerumque dissident; & cogitatis undique congestis indormientes inania somniant, aut aestu mentis agitati, delirantesque portenta vident. Verum cum, se se ut populo venditent, utilitates, quae re praestari non possunt, inauditas magnifice jactent, ac spondeant; admiratio decepta rerum expectatione in contemptum definit; vel dum nubes captant, cum turpiter offendant in iis, quae sunt in conspectu, & usu communi posita, hos sanus quisque tradi illis oportere censet, qui jocularia tractant, ut populo deridendos exhibeant; vel dum nova quaedam, & inopinata proferre laborant, cum ea obtrudant, quibus aequae repugnant & mores, & ratio, quicunque se contagione foeda pollui minime velit, hos tanquam ominosum aliquid, & Averrunco Deo dignum ab se removeret. Quocirca dejecti spe sua  
que-

( LXXXII )

queruntur iniquitatem judiciorum, stultitiam carpunt, ac stuporem vulgi; opiniones eas, quas diuturnus confirmavit, auxitque labor, explosas ab aliis recipiunt rursus ad se; quamque tulerunt repulsam consolantur laudibus iis, quibus inter se large se onerant; ac sibi mutuo spondent aequiora judicia posteritatis adducti fati eorum, quos a suis, cum viverent, neglectos ipsi loco summo habent; quosque, praesentes cum essent, desertos, ac solos fuisse legunt; nulli vero cum sunt, observari, colique vident.

XVI. Rerum demum ad expetendum propositarum sunt adminicula varia, quae tanti haberi solent, quantum ad res ipsas adjumenti afferunt; & quanto res ipsae, quibus famulantur, in pretio sunt. Sic ubi luxuries dominatur, omnisque sapientia ponitur in expendendis, eligendisque deliciis, sumptuosa lurconum gula dignitatem summam conciliat iis, qui, ut ait Plautus in Pseudolo, condita prata in patinis proferunt, & herbas herbis aliis porro condiunt; eis denique potestatem gloriandi, facit immortalitatem se reperif-

( LXXXIII )

perisse , & convivas omnes fecisse Deos , ut nebulo quidam ajebat in Milite Philemonis ; & oculorum , auriumque lascivia maximos honores habet mimae , psaltriae , tibicinae , saltatriculae ; quodque Alexandrinis Dio Prusaensis exprobrat orat. 32. decorum esse , magnique animi putat , se se pro cantrice morti offerre , servumque hominem vocat , cuncto confessu plausu dato , servatorem , ac Deum .

XVII. Eorum igitur , quae homines appetere magna opera solent , haec summa capita sunt ; quae quidem ita digessi , ut ultro appareat origo cujusque , & species ea , qua se se imprudentibus commendarunt , aut falli volentibus causam aliquam ineptam saltem , falsam , iniquam obtulerunt ea magni faciendi , ne nullam prorsus habere viderentur . At minime putandum est ita singulos ordinare cupiditates suas , ut hasce ad omnia aequae adjungant . Neque enim omnes aequae omnibus apti sunt ; neque , dum semel quidpiam pro varia seu natura cujusque , seu vitae , temporumque ratione mentem , animumque occupavit , alia  
aeque



( LXXXIV )

aeque vel aestimare , vel ut assequantur eniti possunt . Quare pro diversa vel mentis vi , vel affectione animi , vel conditione vitae , vel gentis consuetudine , alia aliis praeponi , alia referri ad alia solent : & in singulis quisque conquiescit , vel iis tanquam hospitio utitur occasione data ultra perrecturus . Nam qui commodis abundat , & animo quidem alacri , fervidoque , sed inconstanti una , ac levi praeditus , & si sensu aliquo non occupetur , otiosus fere est , is in voluptate consistit , ac adjungit ad eos se , qui vitam solutam , & vacuam curarum severiorum unice probant . Quare quod a conviviiis , a theatro , a spectaculis , ab alea otii datur , occupant illud , explentque gerrae inanes , scurriles joci , nugarum indagatio percuriosa , sermonesque ii , qui cupiditati possint illecebra aliqua lenocinari . Qui pollet ingenio , si strepitum ferre nequeat , se se fere abdit in arrium reconditarum studiis ; sin is sit , qui commovere se facile possit , animisque valeat , ea fere studia consecratur , quae jactationem in populari celebritate habeant , iisque vel avare ad quaestum ,

( LXXXV )

stum , vel ambitiose ad laudem , & gratiam abutitur . Qui liberalem a natura indolem accepit , aditumque a fortuna impetravit ad honorum gradus , is amplitudini inservit , eoque spectat , ut gloria domi , aut militiae parva floreat , & causam celebritatis , ac nominis transfundat in posteros . Audaces ad omnia si nulla spe domi detineantur , se se fortunae tradunt , eamque vel sequuntur quocunque vocat , vel ambiunt , idque punctum captant , quo se se exorari sinat , & aditum referet ad expromendas , exercendasque facultates eas , quae finibus exiguis contineri nequeunt . Industrii , navi , laboriosi , qui vel respuunt honores propter animi illiberalitatem , vel ab his propter obscuritatem generis respuuntur , fere divitiis inhiant , omnia ponunt in pecunia , suumque defraudantes genium , disperdendas a nepotibus opes congerunt . Inepti contra , sed claro , & honesto loco nati jura tuentur , ostentantque nobilitatis ; honores , quibus aliena virtute partis , luce quasi aliena nitent , gloriose , & magnifice jactant ; cumque nihil omni-  
no

( LXXXVI )

no praestent , addantque de suo , deberi sibi summa omnia arbitrantur . Hilares , amoeni , comes leporem omnem , ac venustatem amant , seque dare solent ad artes eas , quae festivitate , sive jucunditate aliqua delectant , cavillatores faceti , convivae commodi , obsonatores optimi , strenui comissatores , in amoenis rebus , ac voluptariis adversi nemini . Contra feri , & concitati diffidiis oblectantur , inimicitias ultro suscipiunt , ut esse videantur animi magni , pejorem in partem omnia trahunt , ne parum solliciti , & anxii dignitatis vindices habeantur ab sui similibus ; ac sibi tum maxime placent , cum viderint alios nihil tam providere , quam ne vereri parum videantur irritabile genus hominum , & jurgii subinde causas inferens ; tumque se honore maximo affici putant , cum sanus quisque ab se maxime cavet , ne insanis serviat . Qui denique segnes adeo , tardique sunt , ut a caudicibus absint quam minimum , quae vitae vitalis id unum habent , ut ali possint , ibidemque gignuntur , & consenescent , nihil ultra postulant , quam , ut neque de loco movean-

( LXXXVII )

veantur, neque sibi plus oneris imponatur, quam quo se mentis aucta, corporisque otio sagina ipsa gravat. Denique, ut affectionum animi, aut corporis, ita cupiditatum, & opinionum infinita quaedam varietas est. Id enim fere quis appetit, & appetendum esse judicat, in quo maxime naturae munere habilis est; nisi saepe institutio, & ratio interdum alio devocet.

C A P U T III.

*Qua ratione tradita, & quibus ex fontibus hausta sint praecepta de vita, & moribus.*

I. **O**Piniones eae de rebus expetendis, quas aut sensus indidit, aut imaginatio adornavit, aut mens, & ratio sensim expedita protulit, ad artem, & ad praecepta revocatae sunt. Quae quidem praecepta primo rudia fuere, cum neque meliora promere, qui tradebant, neque subtiliora ferre possent ii, quibus illa tradebantur. Concinniora deinde, atque una robustiora

G                      exti-

( LXXXVIII.)

extitere, quod exculta paullatim, atque corroborata ingenia essent; & quae docebantur, ex ipsa natura rerum se se prodente gravissimis in negotiis elicerentur ab iis, qui rebus gestis interfuisent. Postremo ab hominibus otio abundantibus, & in umbraculis ab omni rerum gerendarum luce seclusis adeo minute concisa, exsiccata, & curatura fuere quasi reddita juncea, ut subtilitate nimia vaneferent, ac multitudinis intelligentiam fugerent; aut adeo quasi vepribus interclusa disputationum, atque concertationum, ut omnino deserta exolescerent; & cum essent a vita communi plane repudiata ad inanem ostentationem ingenii ventilarentur, & in nova subinde monstra degenerarent. Qua ex ingeniorum perversitate, sive acumine importuno detrimenta summa consecuta duo sunt: alterum, quod incerta fecere, quae certissima sunt; alterum, quod ii sunt maxime relictii, quibus erat potissimum consulendum. Nam cum nubes quidam, & inania captaerent, cultuque, ac moribus non magis ab humanitate, quam genere loquen-

( LXXXIX )

quendi, ac sentiendi inusitato a communi sensu abhorrent, ab se, praeceptisque suis avertabant eorum animos, quos attentos maxime, sibi que deditos habere debuissent. Deinde cum vitae leges ad ea principia redigerent, quae difficile ab iis percipi poterant, qui multum non essent in rerum abstrusarum cognitione versati, vel dubia saepe, & interdum etiam plane commentitia deprehendebantur, recti, honestique vim infirmarunt, & evidentiam infuscarunt, dum, quod simplex est, insitaeque luce illustratum, confectarium esse voluerunt effari alicujus altius repetiti, quam oporteret, vel arbitraria positione tantummodo nixi. Quemadmodum igitur ex hominum cupiditatibus se se occasione data evolvantibus opinionum, & morum dissimilitudines, & conversiones ductae haecenus, & adumbratae sunt, ne quae cupiditates ingessere, confundantur cum iis, quae natura ipsa commendavit; ita ex eorundem mentibus usu rerum expolitis, & apparatu instructis multiplici notionum se se identidem ingredientium rationes eae derivatae se of-

ferent, quibus varie temporibus variis formari mores coepti sunt; & fontes ii deprehenduntur indicio certo, ex quibus praecepta omnia fluxerunt; ne purum id, ac liquidum existimetur, quod a lutulento saepe fonte haustum est.

II. Ac vetustissima quidem institutendae vitae praecepta fuerunt exempla ipsa, quae oculis objiciebantur, aetate provectorum. Natura enim ultro deferente rudes homines ea fere sequuntur, quae fieri vident; & inculto ingenio, atque cupiditatibus oppido contractis instructi pro lege vitae facta parentum habent, quae nulla mentis opera intercedente per sensus illabuntur in animum, in eoque per diu inhaerescunt. Nam cum nemo plane otiosus esse possit, quod interiore motu perpetuo cieatur, efficaci trahimur omnes ad imitandum studio nec opinantes ea, quae cernimus, qui modus est agendi facillimus; & cum eo sint sensus aciores, quo mens cessat magis, & imagines, quae per sensus influunt in animum, eo distinctius, altiusque infigantur, quo magis in vacua veniunt; capro-

( XCI )

ea propter quae species oculos impulerunt semel, coram adsunt diu planae, & expressae, continenterque movent; ut eadem sint cum incitamenta ad agendum, tum norma, ac regula, ad quam dirigantur incoepta omnia. Quare multitudinem imperitam videmus eorum se se auctoritate fere tueri, quos imitandos ipsi fors obtulit, neque causam aliam afferre, cur quid probet, aut vituperet factum, quam quod idem laudent, aut vitio tribuant ii, in quos tanquam in speculum inspicit; ut non immerito pater ille Horatianus praedicet servare se traditum ab antiquis morem, cum propo-  
fitis alienis exemplis puerum a vitiis absterrebat, aut faciendum quid jubens unum e iudicibus selectis objiciebat. Nestor enim apud Homerum ob  
ipsum id, quod olim viri longe fortiores obtemperassent monitis suis, Achilli, atque Agamemnoni persuadere contendit, ut pareant sibi, desistantque a rixa foedissima: & obstinato Achillis animo, qui summo Graecorum  
in periculo praelio supersedebatur, ea opponit, quae fortiter ipse, cum floreret

Serm.

4. l. 1.

Iliad.

l. 1.

ibid

l. 12.



aetate, pro patria gesserat, ut ille ex his documentum caperet, quam turpe esset otiosum se suorum exitii spectatorem praebere eum, qui posset unus depellere.

III. Proxima docendi ratio, quid homini facto opus esset, ex similitudine ducebatur animantium reliquarum, quae perfamiliares erant, & imaginem quamdam actionum humanarum praeferebant. Ab iis enim, quae gererent ipsi, quod essent in vita agresti, & inculta paucissima, facile deducebantur homines ad ea considerata, quae ex ipsa natura animantium, quibuscum plurimum versabantur, educta vi suapte in sensus ultro incurrebant. Tanto enim acutius ea dispicit, quae se extrinsecus offerunt, quanto minus multis distinctur, inque seipso minus est occupatus animus. Quare excitata ab iis, quae saepe cernebantur, ratiocinandi vis rerum objectarum expositas maxime, & insignes notas inter se comparare, & facile, quod homini esset in vita utile, collatione similium perspicere poterat. Sic Hesiodus ex fucorum more, qui labores apum ignavi absument,

in op.  
& dieb.

( XCIII )

munt, eos esse Diis, hominibusque invisos arguit, qui cum aetatem traducant inertes, ac desides, aliena diligentia parta abliguriunt. Ex quo factum est, ut historiae animalium scriptores artem, in qua versantur, utilem esse perhibeant & cognoscendae rerum naturae parti nobilissimae, & formandis hominum moribus. Est in Aeliani de animalibus libris, Gernerus ait; temperamentum quoddam, & harmonia utriusque philosophiae moralis, & naturalis. Ab animantium enim natura, moribus, actionibus passim hominum mores redarguit, & emendat. Tolerabilius, minusque animos commoturum erat hominem conferri homini, & mutua sui generis comparatione, exemplisque incitari. At facta cum brutis collatione vehementissimum adhortandi, increpandique genus est.

IV. Deinceps ex animantibus ad alias naturae partes progressio facta est; & leges obviae, quibus hae reguntur, ad cohibendas hominum cupiditates translatae sunt. Nam cum externa quisque antea cognosceret, quam propria, & sua, qui cupiditatum aestu

minus abrepti essent, aliena traduxerunt ad eorum moderationem, qui motibus animi vehementibus omnia concedenda censuissent. Sic in Phoenissis Euripidis, ut Eteocles ab immoderata ambitione revocaretur, in subsidium vocat Jocasta solis, & noctis vices, & instrumenta ea, quibus examinatur rerum pondus, & magnitudo internoscitur. Quanto, inquit, satius fuit aequalitatem colere, quae socios sociis ligat, urbesque urbibus? Aequalitas enim mensuras, ac ponderum se librantium momenta constituit, & numeros definit: & obscura noctis facies, & solis jubar lege paritatis annuas explent vices, vincuntque, vincunturque; at invidia vacant, ut usui hominum serviant socialiter. Quae quidem monendi via non erat solum rudibus ingeniis accommodata, quia sensus ipse quodammodo fidem faciebat, sed etiam voluptatis ipsa per se plurimum affert, quod uno intuitu plura labore minimo cognoscenda objiciat, remque aliam ex alia nullo negotio deducendam offerat.

V. Verum cum similitudines hae fu-  
sio-

( XCV )

fio rem aliquanto orationem poscerent ,  
atque praecepti vis expansa latius he-  
besceret , sensim praeceptum ipsum , &  
imago ea , qua veluti vehiculo in ani-  
mum inferebatur , in unum coaluerunt ,  
ut incitatum , ac vibrans acrius per-  
celleret mentem , in eaque altius im-  
primeretur . Ex quo profluxerunt , quae  
paroemiae dicuntur , & translationes  
sunt , ut Aristoteles ait , a specie ad  
speciem , eo jucundiores , quo brevio-  
res , & contortae celerius . Si quis  
enim ex eo , quod Carpathii , leporibus  
in insulam importatis , frugibus cala-  
mitatem acciverunt , persuadere cuiquam  
velit , ut abs. re postmodum nocitura  
abstineat , ac dicat , Carpathius leporem ,  
monitum ea ratione oblatum ocyus fer-  
tur , animo penitius infigitur , assen-  
sumque vehementius elicit . Ita enim  
fere comparati sumus , ut cum impres-  
sionis vivacitate notionis evidentiam  
confundamus , eaque clarius intellige-  
re nos arbitremur , quibus imaginandi  
perculsa vis acrius est : & quae novi-  
tate aliqua commendantur , ea stabilio-  
ra sunt ad diuturnitatem memoriae ,  
neque verustate ulla consenescent . Qua-  
re

Rhet.  
l. 3. c.  
11.

re Aristoteles apud Synesium in Encomio Calvitii paroemias eleganter vocat antiquae philosophiae maximis in conversionibus rerum humanarum afflictae , ac perditae reliquias propter brevitatem , atque dexteritatem ex interitu elapsas .

VI. Sed cum nescio quo fato corruptioni propiora esse soleant , quae utiliora sunt , paroemiae hae , quae cum minus homines ingenio fiderent , a rebus familiaribus depromptae id solum habebant obscuritatis , quod excitare mentes admiratione aliqua captas ad attentionem posset , in ea paulatim , quae vocantur aenigmata , degenerarunt , atque obscuritate sua popularia ab se peruestigandi studia deteruerunt . Ejusmodi quaedam ex Aegypto deportata sunt a Pythagora , cujus praecepta pleraque non admodum a Hieroglyphicis Aegyptiorum litteris distare Plutarchus ait . Sunt enim oraculorum similia , quae , quidquid accidisset , antea praedixisse videri propterea poterant , quia cum nihil explicate , definiteque significarent , in illa quadra-  
bant egregie sensus omnes , et si maxi-  
me

In lib.  
de Is.  
& Os.

( XCVII )

me diffidentes. Haec autem vel de industria conquissiverunt, ut se populo venditarent, & quae saepe vulgaria proferrent; ex consilio Jovis detulisse quodammodo viderentur; ac vulgus, quod ea fere magis admiratur, quae minus intelligit, nunquam non indigeret interprete; vel cum pauca admodum perspecta haberent, ea contulerunt inter se, quae nullo modo congruere poterant. Rebus enim permultis exploratis opus est, ut, quae maxime conveniunt inter se, deligi possint, ne altera alterius in locum invita, repugnansque substituatur: & cum rei cujusque non una sit quasi facies, sed innumerabiles aliis aliae obvelatae, sagacitate quadam admirabili retegantur oportet, quae singulis in rebus delitescunt qualitates omnes, ut ea, quae res unaquaeque cum altera congruit, optime dignoscatur. Hinc in iis praefertim, quae longe distant inter se, pervidere similitudines, Aristoteles esse praestantis ait, & solerter collineantis ingenii.

VII. Ut autem ingenio acuti, atque etiam ambitiosi se se ex iconibus

l. 3.  
Rhet.  
c. 11.  
& l.  
de re  
poet.  
c. 22.

( X C V I I I )

bus ad paroemias , & involucra tenebricosa contulerunt ; ita mitiores animo , qui suavitate magis orationis , quam aculeis delectabantur , ad apologos progressi sunt : & cum illi sententiarum reconditarum tenebris audientes implicarent , hi narratione facili sermone explicata jucunde tenebant , ac leviter occupatos , dum iis non ferarum solum , sed & arborum congressus , atque colloquia proponebant . Quo sane artificio id consecuti sunt , ut quod homini acerbum esset , ac molestum in se , sui que similibus intueri , lubens , oculisque irretortis perspiciat in iis , a quorum natura procul abest ; ac interea dum ipsa cupiditate non repugnante in iis , quae longe distant a se , contemplatur exempla cupiditatis , atque stultitiae , quid ex usu sibi in vita sit , aliud agens intelligat . Sic accipiter apud Hesiodum , dum lusciniac illudit , quod etsi canora sit , in eam tamen vitae , ac necis potestatem habeat , monet , imprudentem illum esse , qui cum potentioribus contendere velit ; quippe quem praeter ignominiam , acerbitates , ac dolo-

in Op.  
& Dieb.

( XCIX )

dolores omnes subire necesse sit. Praeter autem quam quod paratiora ista sunt, cum sit, ut Aristoteles animadvertit, res vere gestas invenire similes difficile, fictas autem excogitare facile ei, qui dispicere possit, quae similitum conditio sit, quod ex philosophia promptum est; id habent praeterea conmodi, quod cum doctoris sit nomen invidiosum, fabulae jucunditate praeceptorum acerbitas temperatur; ut consilium homines, quod a monitore aperte datum, repudiarent, eo latente exhibitum amplectantur quasi sponte natum, aut eductum ab se tantquam opus suum, ut ait Maximus Tyrius, etiam ament. Quare fabulator ille Phrygius, qui, ut inquit Gellius, non severe, non imperiose praecepit, & censuit, quae utilia monitu, suasuque erant, sed festivis apologis involuta in mentes, animosque hominum cum audiendi quadam illecebra induxit, non solum poetis aliis ab Apollonio praeferebatur apud Philostratum, quod ii corrumpant audientium aures, animosque magnis exemplis propositis inducant ad amores ne-  
fa-

Rhet.  
l. 2. c.  
20.

Serm.  
29.  
Noct.  
Att. l.  
2. c. 19.

l. 5. de  
Vit.  
Apoll.



( C )

farios, & opum, regnique cupiditatem; Acſopus autem fabuloſo ſermone oblato demonſtret ex eo, quid agendum, omittendumve ſit, ac de rebus non veris aliquid vere dixiſſe ſe plane indicet; verum etiam princeps ante ſeptem illos, qui ſapientes vocati ſunt, a Lyſippo ſculptus ſtabat: ideoque laudatur id ab Agathia, quod illi ſevere, & aſpere praeſcipiant; ludens hic, & jocoſe ſeria doceat, ac mentem ſermone blando lenitam ſanis conſiliis imbuat.

An-  
thol. 1.  
4.c. 23.

VIII. At interea dum hi res ſalubriter animadverſas apologis obtegebant, eaſdem alii tegumentis allegoriarum obſcurarunt, quae non ex animantium moribus, ſed ex aliarum rerum, quas cognoscebant, omnium proprietatibus contexebant ſive granditatem quandam conſectantes, ſive metu aliquo inducti. Fiebat enim interdum, ut eorum, qui monendi eſſent, audacia, ac potentia dicendi libertas omnis adimeretur. Sic Alcaeus cum Myrſilum, a quo crudeli dominatu Mitylenenſes opprimebantur, aperte non auderet inſectari, tyranni, ac civium in

Herac.  
Pont.  
in Al-  
leg.  
Hom.

in locum tempestatem, ac navem substituit, quae vento afflictâ jam naufragium factura esset; ac dum navis obrutae fluctibus calamitatem queritur, servitutem patriae deslet, exagitatque libertatis oppressorem. Quae cum res esset instituta primo necessitatis forte causa, deinceps propter delectationem, atque etiam ostentationem ingenii frequentata est. Sed cum primo rei cujuscumque pervagatae imagine inducâ veritas ita celaretur, ut pellucere facile posset, ea sensum opinionibus falsis ita quasi incrustata latere coepit, ut ne suspicarentur quidem ineruditi subesse cortici illi quidquam, ac rei signum pro re ipsa sumerent, in eoque subsisterent. Quam ad rem mira consensione conspirarunt vulgus ipsum, philosophi, ac philosophis poetae succenturiati, quibus interjectis conjunguntur inter se contemplatores, actoresque rerum. Nam ut fabulae sunt, ut ait Maximus Tyrius, mediae scientiam inter, & inscientiam, ita qui <sup>Serm. 29.</sup> potissimum spartam hanc ornandam sibi susceperunt, commune doctorum atque imperitorum vinculum habendi sunt

sunt; quippe qui sapientiam, cujus ad adita penitiora pertrahi vulgus non potest, in conventibus hominum frequentissimis versari personatam, ac saepe in scena histrioniam facere coegerunt.

IX. Ac vulgus ineptum quidem ad ea, quae, plane ut intelligi possint, a sensuum consuetudine mentem abductam postulant, ad ea vero mirifice propensum, quae speciem aliquam ad sensus movendos accommodatam habent, nova subinde comminiscendi causam attulit hominibus, qui populo vel ostentare se, vel duces ad meliora esse velent. Quare levitate, & inscitia multitudinis audaciores facti, qui sapientiae laudem affectarent, quidquid erat in vulgus proferendum, convestitum id exhibebant imagine aliqua sensibus obijcienda. Philosophis autem utilissima fuere, & opportunissima integumenta haec ad ea omnia ornanda, quae sibi de rerum universa natura finxerant. Postquam enim ingenio freti quidam majores nido pennas extenderunt, & a rerum formis, quae patent expositae sensibus, ad earum naturam intimam, abdi-

( CIII )

abditamque provecti sunt , mira se  
se portenta de rerum universitatis hu-  
jusce causis , ordine , constitutione so-  
mniantibus obtulerunt . Ac primo qui-  
dem naturam omnem , quod facillim-  
um fuit in obscuritate tanta , divise-  
runt in res duas , quarum altera , ut  
verbis utar Tullii l. i. quaest. Acad.  
efficiens esset ; altera autem quasi huic  
se praebens ea , quae efficeretur ali-  
quid . In eo quod efficeret , vim esse  
censebant ; in eo autem quod efficere-  
tur , materiam quamdam ; in utroque  
tamen utrumque : neque enim mate-  
riam ipsam cohaerere potuisse , si nul-  
la vi contineretur , neque vim sine  
aliqua materia . Deum porro vel uni-  
versum ipsum appellabant , vel vim ,  
seu mentem in omnia fusam , ac varia  
sub imagine rerum latentem . Ex hoc  
fonte sua illa sumpsit Aeschylus : & In Exc.  
Grot.  
terra , & aether , & poli arx est Jupi-  
ter , & cuncta solus ; quod cum sen-  
tentia prima concinit : quodque poste-  
riori congruit , sejunge ab omni forde  
mortali Deum . Ignotus ille est : nunc  
ut implacabilis apparet ignis ; nunc  
tenebris , nunc aquae par ille cerni ;  
H                      simu-

( CIV )

simulat interdum feram, tonitrua, ventos, fulmen, ignes, nubila. Fusam autem per omnes mundi partes esse mentem arbitrabantur eo plane modo, quo per corpus omne nostrum fusam animam existimabant, quae per ossa, ac nervos pertinet tanquam habitus, per principale vero tanquam mens. Nam mundi mens, aut purissimus aether in ea, quae sunt in aere, in animantes, ac stirpes omnes permanere cum sensu conjunctus, terram autem ipsam permeare tanquam habitus a Posidonio credebatur apud Diog. 139. In Exc. Laert. Et Epicharmo quidquid vitae Grot. compos est, mente etiam praeditum videbatur, Pythagoras, quidquid caloris particeps est, vitae item esse, Diog. Laert. l. 8. atque ideo plantas esse animantes opinabatur; quae Democriti fuit, & Platonis sententia; easque sensu, cupiditate, tristitia; voluptate commoveri aiebant Anaxagoras, & Empedocles. Immo vero multi, ut est apud Porphyrium de Abst. l. 3. Deorum, & hominum rationem, quemadmodum ceterarum animantium non re differre inter se, sed gradibus tantum quibus-

busdam existimabant; ut in eodem genere altera perfectior esset, altera deterior: ex quo factum est, ut idearum serie ducti quadam hominem rerum universalium quasi medium statuerent, in quem aucta, vel imminuta definire possent omnia. Quare cum materia, quam variis nominibus appellata vis permeat, assiduo motu cieatur, inter eas naturae mutationes, fieri subinde posse censebant ex omnibus omnia; quam ad rem nihil aliud necesse erat, quam ut aliquid ab altero secerneretur, aut ad alterum accederet. Hinc ex hominibus Deos, ex Diis homines eduxerunt, eosdemque hos in belluas, & stirpes, & saxa converterunt. Hinc Empedocles apud Aelianum bigenera quaedam elicit, & in unum corpus natura duplici coalita. Hinc demum effudit se metempsychosis illa, quam ex Aegyptiorum sacris haustam Pythagoras nobilitavit. Namque ajebant hi migrasse in bovem Osiridis animam, a quo deinceps in posteros transfusa est, referente Diodoro; teste vero Aeliano codicilum Heliopolitae propterea ode-

Hist.  
Anim.  
l. 16. c.  
29.

Diod.  
Sic. l. 1.

Hist.  
Anim.  
l. 10. c.  
21.

rant , quod putarent hujus indutum specie Typhonem Osiridis interfectorem .

X. Arripuerunt haec avide poetae , ex iisque tanquam principiis metamorphoses suas , & formas Deorum varias , quibus induti peragraré omnia solebant , ut virtutes hominum , ac vitia inspicerent , quasi conspectaria deduxerunt . Quas enim rerum mutationes ab aeterno rerum ordine se se subinde explicante prodire temporibus stans philosophi arbitrabantur , poetae has , quandoque liberet , aut opus esset , inferebant in rerum naturam arbitrato suo ; qua in re nihil effici ab iis aliud oportebat , quam ut apte collocatae apparerent occasiones , & causae illae , quibus eventus quisque necessitate quadam alligatus esset . Hae vero saepe arcescebantur ab aliqua perturbatione animi , seu virtute , ac vitio ; quippe quae putarentur ad homines a pravis absterrendos , honestisque studiis imbuendos aptissimae . Sed cum ii , qui miracula conspectabantur , ut essent populo admirabiliores , temere coacervarent , & importune obtruderent omne for-

( CVII )

formae mutatae genus , portenta haec amiserunt fidem , & inter ea spectra numerata sunt , quibus imaginatio oblectari, mundusque poeticus ornari posset actionum , motuum , ac formarum accessione subinde variatus .

XI. Interea vero dum hi sapientiam larvis ejusmodi circumvestiebant , ut esset multitudini spectabilis , ejusdem particulam aliquam alii decerpserunt , & brevi quopiam , acutoque dicto conclusam obtulerunt . Effata haec vel observatione diuturna ex ipsa natura rerum arrepta , vel meditando ex notionibus in mente asservatis expressa plurimum auctoritatis habent tum propter verborum pondus , & gravitatem , quibus devincta sunt , tum propter foecunditatem ipsorum , & accommodationem ad multos vitae casus facilem , & expeditam . Concisa vero brevitatis eorundem efficit , ut ab indoctis etiam , aut occupatis nullo negotio ediscantur , & praesto ad nutum animo ubique sint . Quare multitudo imperita crebrius iis utitur , ex iisque fere de rebus bonis , ac malis judicat . Ista profecto tanti fecit antiquitas , ut inscriberentur tem-



plorum foribus, & in edendis oraculis adhiberentur; vel quia propter vetustatem auctor interdum ignorabatur, annumerarentur pronunciatis iis, quae a natura ipsa hausta, & communi actatum omnium, ac gentium consensu comprobata sunt. Quamobrem ea pueri ediscebant, ut eisdem uterentur aetate corroborata; quemadmodum ait Aeschines oratione contra Ctesiphontem.

XII. At hucusque nihil erat certa ratione, ac via de moribus definitum, quia nondum satis ad id parata mens erat, vel qui potuissent id maxime efficere, se se ad aliarum artium studia contulerant, atque de vita regenda aut omnino non cogitarant, aut si quae meditati essent, ea symbolice ediderant. Quare praecepta morum aliud erant nihil, quam vel collectanea quaedam indigesta commode, breviterque dictorum; vel historiae naturalis omnimode interpolatae confectaria ad mores traducta; vel antiquorum facta praeclara, quae aut hymnis comprehensa inter epulas canebantur, aut admixta ceremoniis Deorum populo propinabantur, aut exaggerata figmentis in scena spectan-

( CIX )

etanda proferebantur . Tandem Socra-  
tes extitit , qui forte incidit in ea tem-  
pora , quibus erant Atheniensium mo-  
res luxu perdiri , & omni flagitio in-  
quinari : Sophistarum autem arrogantia  
verborum lenociniis , tendiculisque fre-  
ta dominabatur ; adolescentes consuetu-  
dine vitae quotidiana corruptos arti-  
bus iis imbuebat , quibus in summa  
rerum inscitia multitudini fucum in  
concione facerent ; ac reipublicae ge-  
rendae scientiam omnem terminabat  
ambitu quodam verborum , atque splen-  
dore sententiarum , quae accommodari  
ad omnia aequae poterant , aut inani  
laetabant spe multitudinis animos . Qua-  
propter is philosophiam a rebus oc-  
cultis , ut ait Cicero , & ab ipsa na-  
tura involutis avocari , & ad vitam <sup>Tusc.</sup> <sup>Quae l.</sup>  
communem adduci oportere censuit ; l. 3.  
eamque propterea devocavit e coelo ,  
& in urbibus collocavit , & in domos  
etiam introduxit , & coegit de vita ,  
& moribus , rebusque bonis , & malis  
quaerere ; vitae praecepta , quae disje-  
cta vagabantur in ordinem quemdam  
redegit ; virtutum notiones obscuras de-  
finiendo illustravit ; confusas , atque

Orat. 15. implicatas partiendo distinxit, & expedit; ignotas inductione rerum similitum investigavit, aliisque ad investigandum viam explanavit. Hinc Themistius eleganter ait, philosophiam sparsim habitantem ab eo contractam in unum fuisse, quemadmodum Athenas a Theseo.

XIII. Quanta scientiae morum obscuritas esset, ac ignoratio, ex iis manifestum est, quae sunt a Platone disputata in dialogis ethicis. Nondum enim constitutum erat, quae vis esset, ac natura virtutis, cujus in Menone pervestigatio instituitur. Nondum erat definitum, quibus inter se notis secernerentur justum, & injustum, quae primo, & secundo de Republica perquiruntur. Quid sanctum esset, ac pium omnino non fuisse ante Socratem indagatum ex Euthyphrone discitur. Quae ex inscitia factum est, ut qui se docturos omnia profitebantur, etsi nihil omnino scirent, inanibus gerris pondus facile dare possent, cum nemo alius haberet quidpiam intelligentia comprehensum, a quo Sophistarum araneae disjicerentur. Neque vero solum res ipsas

( CXI )

ipsas ignorabant , sed rationem etiam , ac viam , qua rerum cognitio certa iniretur , latuisse eos prorsus ex eodem Platone perspicuum est . Nam , ut est in Phaedro , nihil aut mente intelligi , aut oratione explicari potest , nisi quae passim dispersa sunt , ad unam formam quamdam redigantur , ut omnia , quae ratione aliqua conveniunt inter se , definitio una complecti queat ; ac vicissim quae coacta in unum sunt , in partes gradatim tribuantur , ut evolvi singula distincte possint . Ac rursus in Philebo , quoniam , inquit Socrates , quae semper sunt , unum , ac multa sunt , & innatum habent terminum quemdam , ac simul infinitum , ea ut inquiremus , atque alios doceamus , invenienda primum est forma illa , qua continentur omnia ; quae cum inventa sit , recensenda porro singula sunt , ut non solum sciamus unum , & multa , & infinita esse , sed & ea multa quot sint ; neque multis eisdem ideam infiniti prius adjungamus , quam eorum omnium , quae interjecta sunt inter unum , & infinitum , habeamus numerum plane perspectum . Quod eo recedit ,

( CXII )

cidit, ut quia genus est unum, generi vero subjectae species multae, & singularia, quae subjiciuntur his, infinita sunt, antequam ad singularia descendamus, generis inventi species gradatim omnes lustrandae nobis, ac percensendae sint. Ut autem ibidem est, qui tum sapientiae laudem caprabant, interposita transilientes, ab uno continuo pergebant ad infinitum; quae longe distabant inter se; ut est in Politico, cogeant in unum similia rari, cum debuissent tum demum, quae cognata sunt, includere finibus unius, ejusdemque generis, ubi dissimilitudines, quae in partibus essent, omnes exploravissent. Quare in Sophista aperte dicitur iis haud innotuisse artificium, usumque divisionis, quod in causa fuit, ut verborum inopes essent. Nam quo notiones magis involutae sunt, eo pauciora signa postulant, quibus enunciari possint: quo sunt partitae distinctius, eo vocabulorum copiam uberiores augeri necesse est, ut sua cuique nota tribuatur, quâ, cum efferenda est, internosci queat. Nihil igitur sanum, nihil enucleatum ab iis expectari

( CXIII )

rì poterat, qui neque veritatem affecuti erant, neque viam tenebant, qua veritas inquirenda est; artemque disserendi, & dicendi, qua se magnifice efferebant, nugis meris, & inani verborum strepitu definiebant. Quorum ut fastum Socrates retunderet, sapientiam eam, qua vere unus excellebat, celebri illa dissimulatione sua contegendam censuit, ne quos eo volebat adducere, ut se nihil omnino scire cogerentur fateri, prius averteret a congressu suo, quam alacres effudissent scientiam omnem, qua maxime confidebant, eamque nullam esse interrogationibus hominis erudiri volentis irretiti intelligerent. Praeterea cum esset eloquentissimus, artemque dicendi docuisset primus, ut est apud Diogenem Laertium, humili, neglectoque sermone utebatur, ut Alcibiades ait in Convivio Platonis; ut quorum se discipulum simulabat, iis animos adderet ad expromendam audacius eloquentiae suppellectilem eam, in qua se ostentabant, & cum fallaces illae quasi merces essent omnes productae, suis ipsis indiciis earundem inanitas proderetur. Quare nihil afferens ipse

( CXIV )

ipse de suo, sed ea, quae adversarius dederat, in partes omnes versans, eodem sensum progrediendo compingebat illum, ut quae paullo ante confidenter asseverarat, ea defendi non posse confiteretur. Sed interea dum serviens tempori conferebat operae plus ad aliena convellenda, quam astruenda sua, visus quibusdam est docuisse magis quid esset in rebus dubium, quam quid certum, ac verum; & concussisse magis, quam confirmasse fundamenta veri, ac boni. Quod ansam Aristophani dedit ad illum infimulandum, quasi revocaret in dubium ea, quae certissima sunt, ac vera esse magni nostra refert; ac tantum in re quaque verisimilitudinis esse contenderet, quantum ei quis adjungere callide posset orationis fuco, & fallaciis. Quamobrem eorum antesignanum invidiose vocat, qui se se in potestate habere gloriabantur sermonem utrumque, superior qui dicitur, & inferior, qui videlicet rebus eisdem veritatis aequae, ac falsitatis colorem inducere potest. Verum etsi, ne a proposito suo discederet, Socrates affirmaret

ret nihil, quaerendo tamen, & evellendis opinionibus a ratione alienis efficiebat, ut quid esset summum bonum, quae naturae hominum suas in facultates dispersitae responderent virtutes, ac vitia, facile quisque colligeret.

XIV. Hisce institutis, quasi classicum cecinisset, ad excolendam morum philosophiam admirabiliter excitavit hominum studia: sed cum nova potius adinvenisse, quam inventa didicisse, vel absolvisse inchoata videri quisque vellet, miseris eam modis saepe deformarunt, ac novas identidem formas induere coegerunt. Nunc enim caperata fronte, barba horrida, sordidoque palliolo prodibat, exhaustoque rubore omni foedissima quaeque procax admittebat; nunc vestimentis lauta mollibus, & unguentis delibuta convivia delicata venabatur, nec turpe ducebat hominibus sumptuosis supparasitari. Nonnunquam hortulorum amoenitate delectata, facillique victu contenta, desidiosa capiebat in otio, & languore voluptatem: nonnunquam civilibus undis mersabatur, opesque omnes, quae sunt a natura, ac fortunâ impertitae congregabat,

Philosophia  
Cynica

Cyrenaica

Epicurea

Peripatetica



bat, ut iis apte administratis uberrime, quid esse posset in vita commodi, perciperet. Interdum rebus humanis alius evecta divinas contemplabatur, quae sempiternae sunt, mentemque nostram a corpore sevocatam reducendam curabat ad mentem eam, ex qua decerpta credebatur; interdum contemnens homines, ac Deos, & universa ducens infra se posita, cum Jove ipso de libertate, & imperio certabat, seque facturam pollicebatur audacter illos & reges, & Deos, qui sibi relictis aliis adhaerent. Quandoque demum suspensa fluctuabat, & incerta quaerebat, ubi pedem figeret; quandoque desperans id inveniri posse, nullum unquam domicilium certum, ac sedem stabilem habitura susque deque jactabatur arbitrio casuum incertorum. Demum eam quisque specie illa vestivit, quae sibi maxime in promptu esset, aut in deliciis.

Plato-  
nica

Stoica

Scepti-  
caAcata-  
leptica

XV. Nam Plato cum esset ingenio summo praeditus, omnique doctrina expolitus, & in utraque facultate, quod paucis contigit, par, ea videlicet pervidendi, quae sejuncta a concretione

ne

( CXVII )

ne mortali abstractae a sensu mentitantummodo patent, & ea, quae mente percipiuntur, sensibus ipsis exhibendi quasi colorata, ac magnifice illuminata, res hasce duas inter se disjunctissimas una componens, ex utraque conflatum dicendi genus attulit, quod verborum splendore, rerumque pictura pigmentis omnibus illita delectat saepe magis, quam doceat. Et quidem crebro tam intemperanter orationi calamistros adhibuit, ut non solum a Philosophi hominis severitate desciverit, sed etiam vicisse poetarum audaciam dicendus sit. Hinc cum quidam, ut apud Longinum est, suggillarunt, quod in translationes immoderatas, & allegoricum tumorem correptus quasi furore quodam efferatur; atque a Dionysio Halicarnassensi notatus est eo nomine, quod temniscos verborum studiosius fuerit, quam rerum pondus, confectatus. Quare dum a sensilibus ad insensilia, a rerum imaginibus perpetuo fluentibus ad rerum species ipsas, quae neque gignuntur, neque interiturae sunt unquam, traducit animos, ut umbrarum harum

de Sublim. c. 28.  
de Grav. orat. Demo. st.  
con.

( CXVIII )

consuetudine contractus error luce veritatis eluatur , allegoricis involucris omnia praetextens retrahit ad umbras easdem , & sublustri nitore quodam occupatos ita afficit , ut admiratione potius obstupefactos dimittat , quam evidentia collustratos . Cum enim poetarum omnes undique flosculos collegisset , & numerorum mysteria , doctrinamque idearum ab Epicharmo adumbratam penitus introspexisset , coegit in unum haec omnia se se vicissim impedientia , perque flexuosa , & fabulosis imaginibus interspersa circumductos eo quosque trahit , ubi se nemo recognoscat , sed ipsa rerum universitate circumfusus absorbeatur , ac denuo conjunctus cum mente summa , ex qua delibatus est , se se Deum esse credat .

In  
sompn.  
Scip. c.  
8. Nam , ut ex sensu Platonis Tullius , Deus est , qui viget , qui sentit , qui meminit , qui praevidet , qui tam regit , & moderatur id corpus , cui praepositus est , quam hunc mundum princeps ille Deus ; ut minime videri mirum debeat , si tam multi ex hac disciplina fanatici , lymphatique prodierunt , ac tam multa poeticis decora fabu-

( CXIX )

fabulis arrepta a poetis avide, & ad fastidium usque inculcata sunt.

XVI. Contra Aristoteles aequae summae facultatis, ac severissimi judicii vir id sibi arrogare uni jure suo potest, quod a Maximo Tyrio de philosophis generatim dictum est; ejus <sup>Max. Tyr. ferm.</sup>

enim corroborata mens, & impatiens <sup>29.</sup>

aenigmatum ex involucris exsculpfit philosophiam, exiitque mundo suo, ac nudis est verbis usus. Ratiocinationes astrinxit legibus definitis, & undique enucleatis; a singulis ad universa progreditur, quae sola scientiam gignere possunt; quorum cum experientia ipsa primus aditus sit, planior est, ac tutior progressus; nam quisque compertum habet, unde digressus fuerit, & quam viam insistat, & quo sibi contendendum sit. Atque, ut attingamus quod ad rem maxime facit, cum Plato mundum hunc universum

( utar enim verbis Tullii ) unam civitatem esse communem hominum, ac <sup>De Leg. l. i. c. 7.</sup>

Deorum, hominesque Deorum agnatione, & gente teneri existimaret; ob eamque rem praeceptionibus suis immensitatem tantam amplexus esset,

I

quan-

quanta ab hominibus in rebus agendis  
 occupatis difficile comprehendere potest,  
 Aristoteli visum est opportunius unum-  
 quemque putari non mundi universi,  
 sed unius tantum reipublicae civem,  
 atque ad hunc morum doctrinam ac-  
 commodari; quod eam cognationem,  
 quae astrictior esset, & mutuis, ac ma-  
 nifestis officiis corroborata, valere plus  
 ad homines in officio continendos ar-  
 bitraretur, quam quae tam longe, la-  
 teque protendatur, ut exaequet infini-  
 tatem naturae semotam a captu com-  
 muni hominum, qui praeceptis insti-  
 tuendi sunt. Quare dum Plato Arith-  
 meticae, Geometriae, atque Astrono-  
 miae ope homines a concretis ad in-  
 telligibilia, a sensibus ad mentem eve-  
 here nititur, animumque prorsus a cor-  
 pore separandum esse docet; Aristote-  
 les eo quemque duxit, quo, qui vi-  
 tam civilem agit, aspirandum esse per-  
 suaderi sibi facile sinat; & quae vide-  
 bat nullo modo pati homines, ut e  
 manibus extorqueantur, iis qua ratione  
 recte uti possent, ostendit. Nam qui  
 praeceptis suis iis tantum consulit,  
 qui rerum intelligibilium contempla-  
 tione

( CXXI )

ratione contenti sint ad beate vivendum, gentis humanae partem maximam ducit aut contemnendam, quod est superbissimum, aut ad miseras unicenatam, quod cum absurdum est, tum inhumanum, ac ferum. Hinc Plato ipse, qui non hominum, sed mentium a corpore sejunctarum societatem instituere conatus est, eamque devincire communione rerum earum, quae sensuum vim omnem fugiunt, ne tamen a multitudine plane repudietur, ei sensuum, ac rerum externarum usum concedit, & virtutes, quas civiles appellat, positas esse decernit in mediocritate ea, quam fuisse deinceps Aristoteles persecutus est, & philosophi plerique amplexi sunt. Atque ad hanc austruendam, aut exornandam alii ex alia disciplina, ac scientia praesidia deduxerunt. Plato enim ex sanorum legibus l. de  
Rep. 4. aurium iudicio comprobatis eas leges eduxit, quibus apte summi cum infimis temperati cives, tanquam soni dispares, consociantur, & simplicem quasi concentum efficiant: idemque in singulis facultates animae concupiscentem, irascentem, & rationalem ex interval-

( CXXII )

lis iis moderandas esse praescripsit ,  
quibus inter se summus , & imus , &  
medius in fidibus nervi respondebant .  
In Quæst. Plutoniciis Quæ Plutarchus explicans attributam  
a Platone rationem summæ , iram me-  
diæ , cupiditatem infimæ chordæ pu-  
tat ; cum rationis ea natura sit , ut  
imperet ; iræ , ut regat , & regatur ad-  
jutrix rationis , & affectatrix ; cupidi-  
tatis demum , ut omnino pareat ; quip-  
pe quæ plane rationis impos a Platone  
creditur . Ptolemaeus autem rem pro-  
movit longius . Non enim solum ra-  
tionalem facultatem cum dia - pason ,  
Har- mon. l. 3. c. 5. irascentem illi proximam cum dia - pen-  
te , & concupiscentem a rationali re-  
moriorem cum dia - tessaron congruere  
censuit ; verum etiam facultati cuique  
virtutes tot adscripsit , quot sunt conso-  
nantiae cujusque species ; tres nempe  
concupiscenti , quatuor irascenti , se-  
ptem denique rationali . Nam concu-  
piscentis , inquit , ut consonantiae dia -  
tessaron , tres sunt virtutes ; temperan-  
tia in contemnendis voluptatibus ; con-  
tinentia in perferenda indigentia ; &  
verecundia in vitandis turpibus : irascentis ,  
ut consonantiae dia - pente , quatuor ;  
man-

( CXXIII )

mansuetudo videlicet in ira cohibenda ; intrepidus animus in reprimendis terroribus impendentium calamitatum ; fortitudo in despiciendis periculis ; ac tolerantia in laboribus sustinendis : rationalis demum septem sunt , ut dia-pason ; nimirum acumen , cuius est expedite moveri ; ingenium , cuius est collineare ; perspicacia , qua res discernuntur ; iudicium , quo de rebus recte statuitur ; sapientia , quae in contemplatione ; prudentia , quae in actione ; & peritia , quae in exercitatione versatur . Rursus cum jam divisisset sonos in unisonos , consonos , & concinnos ; unisonosque vocasset eos , qui dia-pason constituunt ; consonos , qui dia-pente , & dia-tessaron ; concinnos denique eos , qui tonici sunt , & quorquot componunt consonantiarum minimam ; quae , inquit , ad rectum mentis , & rationis usum spectant , unisonis assimilantur ; consonis autem , quae pertinent ad sensuum , & corporis aptam constitutionem , ad fortitudinem , ac temperantiam ; concinnis porro , quae referuntur ad affectionem aliquam ; universae demum perfecti systematis harmoniae



( CXXIV )

morum universa philosophia congruit ;  
ut & virtus animorum quaedam concinnitas , & concinnitas virtus quaedam sonorum appellanda sit . Aristoteles vero sitas esse virtutes in medio quodam probat ex natura tum affectionum omnium, quae eo, quod nimium, & eo, quod parum est, intereunt ; tum magnitudinis sive continuatae, sive disjunctae, qua in omni majus, minus, & aequale sumi potest . Sed haec generatim attigit Aristoteles : at Pythagoraei, qui magnitudinis disjunctae, seu numerorum doctrinae se se totos addixerant, ea distinctius executi sunt . Nicomachus enim Gerasenus in deductione ad scientiam numerorum a Jamblichio exposita, cum numerum, qui per se par est, & omnino liber ab affinitate imparis, alium esse docuisset plusquam perfectum, alium deficientem, eique contrarium, alium demum perfectum, & inter utrumque medium ; alium scilicet, quo major est summa confecta ex partibus, in quas dividi potest ; alium, quo minor ; alium, cui prorsus aequalis eadem summa est ; numerum perfectum, qui primus post unitatem est  
fena-

Eudem.

l. 2. c. 1.

Eth.

Nicomach.

l. 2. c. 6.

( CXXV )

fenarius , assumpsit ad virtutum demonstrationem , quae non extrema quaedam esse ait , ut visum nonnullis , sed media inter id , quod nimium est , & id , quod parum ; & opponi quidem malum malo ; utrumque vero uni bono ; bonum autem bono nunquam , sed duobus malis simul ; ut audaciae timiditatem , quibus ignavia communis est ; audaciam autem , atque timiditatem fortitudini . In eo pariter similitudinem virtutis , ac vitii cum numero perfecto , & superante , sive deficiente esse statuit , quod superfluos numeros , ac diminutos longe multos , infinitosque reperiatis nullis ordinibus passim , inordinateque dispositos , & a nullo certo fine generatos ; contra perfectos raro invenias , eosque facile numerabiles ; quippe qui pauci sint nimis constanti ordine procreati . Raritas enim perfecti numeri , tanquam boni cuiuspiam , non varii , multiplicisque mali , naturae lege unum tantum exhibet in numeris , qui sunt infra denarium ; unum in denariis , qui sunt infra centenarium ; unum in centenariis , qui sunt infra chilia-

Boeth.  
a Te-  
null.  
cit. ad  
hunc  
locum.

dem ; atque ita deinceps in infinitum .

XVII. Interea vero dum ex hisce principiis isti virtutis ad humanam societatem accommodatae fundamenta repete-  
bant ; quippe quae reddat hominem actuosum , & aptum ad ea gerenda , quae ut confici possint , omnes omnibus indigent ; alii ex fontibus aliis eam virtutem derivare conati sunt , quae dum seorsum quemque perficere creditur , vinculum societatis maximum abscindit quodammodo . Nam Zeno , qui morum insita severitate delatus sordibus deterfis , ac defricata impudentia disciplinam Cynicorum excoluit , atque nobilitavit ; cum in ea esset opinione , ut putaret animam nostram particulam esse mundanae animae , purissimi videlicet aetheris universa pervadentis ; naturam autem Deum ipsum esse mundo permixtum , ignem nempe rationis , ordinis-  
que participem , ac nominibus insignitum variis pro partium varietate , quas dum permeat , alias alia forma induit ; ideo docuit hominis finem ultimum esse Deum sequi , seu consentaneae naturae vivere , seu sensibus adhaerere animi

( CXXVII )

animi cujusque proprii , qui sit e  
materiae crassioris laqueis expeditus ,  
neque prohibeatur infita sibi perfectio-  
ne frui . Quoniam enim Deus est ani-  
mus cujusque , perfectus est ipse per se .  
Quamobrem id unum curare debet ,  
ut impedimenta arceat , quibus usus  
absolutae naturae suae purus , atque  
sincerus intercipi potest . Haec autem im-  
pedimenta proveniunt ab iis , quae  
sunt extra nos , & nullo consilio no-  
stro mutari possunt ; quippe quae fato  
regi Stoici arbitrantur , vi nempe qua-  
dam universum hoc ordine gubernante ,  
quae constans est . Quare Zeno censuit  
esse oportere a sapiente aliena externa  
omnia ; ne sapiens , si quae non sunt in  
potestate sua , pertinere ad se credat ,  
opinionibus temerariis , ac moribus per-  
turbatis exagitetur ; quo nihil adver-  
sum magis est naturae stabilitati , &  
constantiae . Se se igitur animus ad se  
retrahat oportet , in se uno ponat om-  
nia , sibi que sufficiat unus , ut liber  
omnino sit . Et si vero sempiterna re-  
rum serie implicetur animus etiam sa-  
pientis , nihil ei tamen de libertate  
sua delibatur , quod ea ipsa faciat ,  
quae ,

( CXXVIII )

quæ, si nulla fati necessitas cogeret, electurus esset, ac iudicio suo gerens, & administrans omnia, fatum sequatur libens, non invitus a fato trahatur, ut insipiens vulgus, ac servum solet.

XVIII. Contra Epicurus cum putaret universa casu jactari, sapientiam, atque constantiam omnem removisset a rerum universitate, seriemque causarum discidisset, quæ se se explicantes a summa quadam in eandem revolvantur; genus humanum universi partem esse voluit omnino divulsam ab aliis; exsolvitque potestate, ac metu Deorum, quos procul ablegatos locavit in intermundiis otiosos, ne quod ii nobis negotium facebant, aut eisdem nos molesti simus, ex quo tranquillitas animi perturbetur. Homines autem in libertatem vindicatos, exemptosque cura omni potestatis ejus, quæ mundum universum regit, rerum etiam harum, quæ nos propius attingunt, obsidentque, dominatu liberare conatur, quantum potest. Cum enim cupiditatum, quibus iis alligamur, atque subijcitur, alias excitari videret  
a na-

( CXXIX )

a natura ipsa , alias opinione , quae naturae conformis , & a natura aliena esse potest ; atque ob id naturales esse quasdam , ac necessarias ; naturales multas , at non necessarias ; plerasque vero neque necessarias , neque naturales ; primo cupiditates omnes inanes eradicandas esse duxit ; deinde circumcidi iussit eas etiam , quae non indigentiae succurrunt , sed varietatem voluptatum faciunt , nimirum , ne perturbata , curisque plena degenda vita sit . Zeno igitur , & Epicurus diversis ex oris solventes , eodem recidunt , ut sapientem indigere quam paucissimis arbitrentur , & una quasi tantisper itinere facto diducuntur , alter ut omnem provocet audax fortunae vim , & cum ea pedem conferat robore animi , sapientiaque fretus ; alter ut eandem cautus subterfugiat , incursusque declinet , ne sit ei cum labore aliquo molesto pugnandum ; uterque metu omni liberati ; quod ille universi naturam , qua involutus est , ultro sibi sequendam existimet ; hic autem sollicitus de se uno , nihil eam ad se pertinere putet , a qua sit omnino disjunctus .

( CXXX )

XIX. Atque ad haec summa capita revocari possunt, quae de vita instituenda a philosophis inuenta sunt. Vel enim extulerunt ad superna hominem, vel ad humana devocarunt; suaeque praecepta direxerunt in primis utrique ad vitam aut socialem, aut solitariam. Siquidem alii sapientem suum evehere contenderunt ad earum formarum contemplationem, quae sempiternae sunt, & cum singulae complectantur universa, quae sunt generis ejusdem, harum ope mentes inter se consociare studuerunt aetas a sensibili ad mundum intelligibilem, quem omnes aequae participare possunt: alii cives informarunt ad res gerendas, & excolenda officia ea, quibus mutuo sibi prodesse ad omnes vitae commoditates: alii cum se quisque mundi partem ipsam per se perfectam arbitrarentur, se se maxime dimovebant ab aliis, & vincula omnia dissolvebant, quibus ad vitae civilis communitatem allicimur, ne quid a constantia, quam sibi finxerant, abscedere cogerentur, si conjuncti cum iis essent, qui motibus variis agitari solent. Nam sapiens qui sit inter ipsos

( CXXXI )

fos nullius miseretur , parcit nulli , caeterosque omnes amentes esse , servos , fugitivos putat : alii demum consulere sibi quemque debere statuerunt , neque se negotiis aliorum adungere , ne quid inde molestiae sibi arcessat , aut detrahat voluptatis , si forte digi- tum unum discedat ex hortulis suis , aut ex his caput proferat . Omnes au- tem virtutem esse necessariam existima- runt vel ad purgandum animum , ut liberius , expeditiusque contemplationi vacet ; vel ad efficiendum eundem re- bus agendis aptum ; vel ad eam firmitatem adipiscendam , ut , si fractus il- labatur orbis , aut in tauro Phalaridis ustuletur , sapiens tamen quietus sit , ac securus : alii tandem ad acquiren- dam animi tranquillitatem , ac volupta- tem liquidiores . Verum dum Philoso- phi magis quam par sit , extollunt homines , aut obdurant , aut enervant , ineptos eos reddunt ad civiles usus ; ac dum sive reluctantes protrudunt in invia , sive proniores per devexa pro- pellunt , labefactant utrosque , & aver- tunt ab iis , quae felicitatis humanae fundamenta natura jecit .



( CXXXII )

XX. Quae cum omnia fluxerint ex opinionibus iis de natura rerum , ad quas erant forte delati vel affectione animi cuique propria , vel analogia incerta quapiam , & obscura ; factum est , ut rationem distorserint , aut infuscarint illi in primis , qui rationi perficiendae operam navasse maximam videbantur . Nam fere qui valet ingenio plurimum , eoque sine intermissione utitur , dum fastidit , quae in promptu sunt , ac rimatur abdita , circumseptus tenebris iis , in quibus haec demersa latent , imagines ipse sibi rerum vanas adornat , easque arbitrato suo colorat , & comit ; ac somniantium more , cum nunquam species hasce cum rebus ipsis conferat , ei ne subolet quidem nebulam esse , quam Junonem credit . Ac si forte mens aliquando experrecta sit , seque ad res ipsas referat , attenuata jam speculationibus vanis , ea sustinere non potest , quorum ut impressio quasi recipi possit , substratu quodammodo solidiore quodam opus est . Quare , quod ponderosius est , per attenuatae , futilisque mentis quasi rimas elabitur , effluitque ; quod est levius , expansum-  
que

( CXXXIII )

que latius detinetur ipsa levitate sua .  
Frustra igitur vitae leges a natura prae-  
scripras , ac ratione sana quaereret quis-  
piam ex sententiis philosophorum ; cum  
saepe rationi sincerae , ac purae non  
magis infesti vulgi mores temerarii fue-  
rint , quam industria doctorum quo-  
rumdam ; ut non injuria Seneca philo-  
sophiam non in remedium animi , sed De Be-  
nef. l.  
7. c. 1.  
in exercitationem inventam ingenii ,  
multisque periculi causam fuisse con-  
questus sit . Ep.  
103.

V E N E T I I S

APUD SIMONEM OCCHI

MDCCXL.

<i>Err.</i>	<i>Corr.</i>
P. 5. <i>Ep. Nunc.</i> intelli-	intelligentia
gentie	
p. 6. quodan	quodam
p. 7. e	&
ibid. comiis	comius
p. V excitat	excitant
p. VIII. qui dqud	quidque
p. IX. fenti	fentit
p. XIV. qui	quae
p. XVI. comprimas	comprimat
p. XIX. praedat	praedae
p. XXV. At	Ap
p. XXXVIII. pene	pone
p. LII. Dialog.	Diog.
p. LXIV. promoveri	permoveri

5834304

